

逸周書補注

逸周書卷十四

晉孔晁注

江都陳逢衡稱注

謚法解第五十四

郡齋讀書志曰周公謚法一百九十餘條衡案宋史禮志太平興國八年詔增周公謚法五十五字美謚七十一字爲一百字平謚七字爲二十字惡謚十七字爲三十字則是周公謚法原本止當有九十五字今檢謚法解所載自一人無名曰神至貞心大度曰匡共一百八十餘條而唐張守節所錄以冠於史記

者計一百九十四謚與晁氏所謂一百九十餘條合
若不數重字止得九十九謚則與宋禮志所云爭差
不遠蓋今本尙有空方三字故也盧抱經謂此解錯
簡甚多良然王圻續通考卷一百三十四載周公謚
法並註蓋從史記正義而注又多不相同蓋王氏雜
取他書改酌成文不足以訂孔晁本注之誤

維周公旦太公望開嗣王業建功于牧之野終將葬乃制

謚遂敘謚法

盧文弨曰案王伯厚困學紀聞云周書謚法
惟三月既生魄周公旦太師望相嗣王發既

賦憲受臚于牧之
野將葬乃制作謚

補注此因武王將葬議於南郊而作古者生無爲死
無謚謚法周公所爲也

謚者行之迹也號者功之表也車服者位之章也

孔注古者有大功則賜之善號以爲稱也

補注禮外傳謚者行之迹也累積平生所行事善惡
而定其名也禮表記謚以尊名注謚者行之迹也五
經通義曰謚者死後之稱累生時之行而謚之生有
善行死有善謚所以勸善戒惡也白虎通曰號者功
之表也所以表功明德號令臣下者也崔駰章帝謚

議曰臣聞號者功之表謚者行之迹據德錄功名當
其實車服者賜葬之器如公以九爲節侯伯以七爲
節故曰位之章魯語孟文子曰車服表之章也

是以大行受大名細行受細名行出于己名生于人

自謚者行

之迹也至此魏書甄琛傳引同

孔注名謂號謚

補注禮外傳有大行受大名小善受小名小猶細也
晉書嵇紹傳謚號所以垂之不朽大行受大名細行
受細名後漢安帝紀注引前書音義云禮有大行人

有小行人主謚號官也衡案周禮王謚掌於太師賜
謚掌於太史大行人小行人並非掌謚號之官穀梁
桓十八年注昔武王崩周公制謚法大行受大名小
行受小名所以勸善而懲惡禮天子崩稱天命以謚
之諸侯薨天子謚之卿大夫卒受謚於其君故公羊
說謂天子謚於南郊御覽五百六十二引大戴曰周
人公旦太公望相嗣王作謚法謚者行之蹟也號者功
之壯也服者位之彰也是以大行受大名細行受細
名行出於己名生於人謚慎也以人之始終悉慎錄

之以為名也案大戴亦有謚法與周書同如官人解之亦見大戴是也今大戴僅存官人而謚法亡矣

一人無名曰神盧本從史記正義改作民無能名曰神

孔注不名壹善

補注一人尊無二上之稱無名者無得而名也鵷冠子道瑞曰莫不受命不可為名故謂之神孔子曰大哉堯之為君也巍巍乎唯天為大惟堯則之蕩蕩乎民無能名焉是其證也北魏神元皇帝謚神

稱善口間曰聖問去聲史記正義作揚善賦簡盧本作稱善賦簡

孔注所稱得人所善得實所賦得簡
補注聖通明也盧文弨曰闕處疑是無字所謂禹吾
無間然方與聖相稱沈濤曰民無能名曰神稱善無
間則能名矣故孟子曰大而化之之謂聖聖而不可
知之謂神衡案索隱引世本有衛聖公馳爲慎公之
子又姓氏書辨證四十勁引姓源韻譜聖氏八愷隲
斂謚聖後世氏焉

敬賓厚禮曰聖

孔注聖於禮也

補注禮鄉飲酒義仁義接賓主有事俎豆有數曰聖
德象天地曰帝

孔注同於天地

補注易坤靈圖德配天地在正不在私曰帝樂稽耀

嘉德象天地為帝白虎通德合天地者稱帝

靜民則法曰皇

盧文弨曰正義靜作靖注同二字本通

孔注靜安也

補注獨斷皇者煌也盛德煌煌無所不照風俗通三

皇道德元泊有似皇天故稱曰皇皇者中也光也宏

也白虎通皇君也美也大也盧文弨曰論衡獨斷皇
並作黃案黃帝亦作皇帝三字亦本通衡案論衡道
虛篇曰黃帝好道遂以升天臣子諫之宜以仙升不
當以黃謚謚法曰靜民則法曰黃黃者安民之謚非
道德之稱也又白虎通曰古者先黃後帝何黃帝始
制法度得道之中萬世不易後世雖聖莫能同也後
世德與天同亦得稱帝不能制作故不得復稱黃也

仁義所往曰王

往舊作在今從史記正義白虎通引禮記
謚法仁義所生稱王文選兩都賦序注引

樂稽耀嘉仁義所生為王
案兩生字俱往字之誤

孔注民往歸之也

補注公羊成八年注仁義合者稱王白虎通仁義合者稱王春秋元命苞王者往也神之所輸向人所樂歸也春秋文耀鉤曰王者往也神所向往人所歸落呂覽下賢曰王也者天下之往也韓詩外傳曰王者往也天下往之謂之王春秋繁露滅國曰王者民之所往又深察名號曰王者往也風俗通皇霸引書大傳王者往也爲天下所歸往也

立志及衆曰公

孔注忘無私也

補注春秋元命苞公之為言公正無私也

執應八方曰侯

獨斷同

孔注所執行八方應之也

補注白虎通侯者侯也侯逆順也案執應八方蓋即

屏藩之義施彥士曰古者生無爵死無謚故以爵列

謚法之首蓋惟克稱其爵乃可以議謚

壹德不懈曰簡

獨斷同盧文弨曰左昭二十二年正義作壹意不懈曰簡

孔注壹不委曲

補注周王夷謚簡王晉書郭奕太康八年卒詔曰謚

所以旌德表行案謚法壹德不懈為簡奕忠毅清直

立德不踰於是遂賜謚曰簡又唐尉遲汾杜佑謚議

曰佑之寬容得眾全和葆光不病於物類其能考終

得不為寬容乎和好不爭衡案謚法好和不爭曰安當云得不為好和不爭乎

又漢書孝安皇帝注引寬容和平曰安亦當云得不為寬容和平乎疑所引有誤自卑士而

極眾任一心於理以惠物潔行廉止人無尤怨得不

為壹德不懈乎請謚為安簡

平易不疵曰簡

疵史記正義作訾唐楊綰謚議引疵作懈盧文弨曰此簡字不優於文而列於文之

前蓋篇中錯簡多矣史記正義本作兩排首排盡然後及次排此簡字在恭欽定襄之前則固灼然可尋也

孔注疵多病也

經緯天地曰文

獨斷同

孔注成其道也

補注經緯天地如周文公是已詩皇矣比于文王傳

左襄二十八年傳周語思文后稷注並云經緯天地

曰文書堯典欽明文思安安馬注鄭注並云經緯天

地謂之文又左二十八年傳服注德能經緯順從天

地之道故曰文

道德博聞曰文

禮檀弓公叔文子疏
唐楊綰謚議並同

孔注無不知之

補注道德博聞如孔子是已宋夏竦始謚文正司馬
光奏曰謚法本意所謂道德博聞曰文者非聞見博
雅之謂也

勤學好問曰文

舊作學勤史記正義同
今從欽定續通志改

孔注不恥下問

補注論語子貢問曰孔文子何以謂之文也子曰敏
而好學不恥下問是以謂之文也疏案謚法勤學好

問曰文

慈惠愛民曰文

白虎通引禮記謚法漢書孝文皇帝注左傳文公釋文及疏穀梁文公疏論語公叔

文子疏引並同

孔注惠以成文也

文盧本從史記正義作政

補注慈惠愛民如漢孝文帝是已春秋時邾文公卜

遷于繹志在利民亦慈惠愛民之一證遷繹事在魯

文公十三年孟子滕文公疏以其能慈惠愛民故以

文為謚

愍民惠禮曰文

孔注以禮安人

盧本從史記正義作惠而有禮

錫民爵位曰文

孔注與同升也

舊作舉可舉也今從史記正義

補注論語公叔文子之臣大夫僕與文子同升諸公

子聞之曰可以為文矣疏以謚法錫民爵位曰文故

也

剛彊直理曰武

論語孟武伯甯武子叔孫武叔疏引並同直理盧本据北史于忠傳改作理直又云

白虎通引禮記謚法彊理勁直曰武衡案于忠謚議見魏書北史于忠無傳

孔注剛無欲彊不撓直正無曲理忠恕也

盧本作理忠恕直無

史記正義

威彊敬德曰武

漢書孝武皇帝注引同盧文弨曰正義敬作敵注云與有德者敵訛

孔注思有德者敵也

補注楚語昔衛武公年數九十有五猶箴儆於國於

是作懿戒以自儆及其沒也謂之睿聖武公章注謚

法曰威彊睿德曰武

克定禍亂曰武

後漢書光武皇帝注左傳隱元年疏引並同獨斷克作尅冊府元龜五百九十五趙

雲別傳姜維議引謚法克定禍亂曰平

孔注以兵征故能定

為武曰敵也

補注武定禍亂如湯武是已禮外傳武定禍亂其功

大也書大禹謨乃武乃文傳武定禍亂文選述高帝

紀注引項岱尅定禍亂關土升彊曰武

刑民克服曰武

孔注法以正民能使服

大志多窮曰武

大廬本從史記正義作夸

孔注大志行兵多所窮極

敬事供上曰恭

左傳隱元年疏引敬長事上曰共後漢章德賈皇后謚曰恭注引謚法敬事尊上曰

恭

孔注供奉也

補注周王伊扈謚共共恭同凌曙曰按檀弓是以爲
恭世子也疏申生不能自理遂陷父有殺子之惡雖
心存孝而於理終非故不曰孝但謚爲恭以其順於
父母而已謚法曰敬順事上曰恭

尊賢貴義曰恭

孔注尊事賢人寵貴義士

尊賢敬讓曰恭

孔注敬有德讓有功

既過能改曰恭

唐許敬宗謚議引同
獨斷既過作知過

孔注言自知也

補注左襄十三年傳楚共王卒子囊謀謚大夫曰君

有命矣子囊曰君命以共若之何毀之赫赫楚國而

君臨之撫有蠻夷奄征南海以屬諸夏而知其過可

不謂共乎請謚之共大夫從之共恭同魯語閔馬父

曰楚共王能知其過而為恭晉語是以謚為共君

謂申

生 韋注謚法既過能改曰共國人告公以此謚也又

楚語可不為恭乎

謂楚恭王

韋注謚法既過能改曰恭

執事堅固曰恭

孔注守正不移

補注如宋共姬逮乎火而死是也

安民長弟曰恭

長上聲安盧本從史記正義改作愛

孔注順長接弟

盧文弨曰接本一作按疑二字俱誤

補注長如長養之長弟豈弟也

執禮御賓曰恭

盧文弨曰御舊作敬正義前編俱作御注亦釋御字也衡案御當讀如迓

孔注迎待賓也

芘親之闕曰恭

孔注脩德以蓋之也

補注易所謂幹父之蠱也魯語閔馬父曰周恭王能
庇昭穆之闕而為恭注庇覆也恭王周昭王之孫穆
王之子昭王南征而不反穆王欲肆其心皆有闕失
恭王能庇覆之故為恭也

尊長讓善曰恭

長上聲盧本從史記正義
作尊賢案尊賢前已兩見

孔注不專己善推於人也

補注尊長尚齒也讓善貴德也

淵源流通曰恭

盧文弨曰案正義以文武成康昭穆為次
其淵源流通曰康在溫柔好樂曰康三句

之前今錯簡於此改康為恭非本文也又書正義引作淵源流通曰禹案獨斷有堯舜禹湯之謚史正義僅有除堯去虐曰湯一謚而此無之然案書湯普釋文引馬融之說謂禹湯皆不在謚法中故今亦缺之

孔注性無所忌也

此注與正文不合蓋恭謚下脫去孔注而此注又脫去正文一條故

兩不相附

照臨四方曰明

後漢書孝明皇帝注引同

孔注以明照之

補注左昭二十八年傳詩皇矣其德克明箋禮樂記

其德克明注並云照臨四方曰明服虔曰豫見安危

也書堯典欽明馬注鄭注並云照臨四方謂之明文

選述高帝紀聰明神武注引項岱照臨四方曰明

欽定續通志謚略日照臨四方漢孝明帝是也

譖訴不行曰明

孔注逆知之故不行

補注論語子張問明子曰浸潤之譖膚受之愬不行

焉可謂明也已矣

威儀悉備曰欽

一切經音義卷二十四引悉備作備悉誤

孔注威則可畏儀則可象

補注欽敬也堯典馬注威儀表備謂之欽表當作悉

此謚唐明宗用之

大慮慈民曰定

慈民舊作靜民史記正義同案靜訓安與下安民大慮復今從獨斷

孔注思樹惠也

補注周王瑜謚定王

安民大慮曰定

左傳定公釋文又疏穀梁定公疏引並同

孔注以慮安民

補注孟子滕文公薨疏以其能安民大慮故以定為

謚 欽定續通志謚略曰安民大慮魯定公是也

安民法古曰定

孔注不失舊意也

舊意疑作舊章

純行不爽曰定

爽舊作二今從史記正義左傳襄四年定妣疏同冊府元龜五百九十五引作其行

不差誤

孔注行壹不爽

補注所謂有大醇無小疵也

欽定續通志謚略曰

純行不爽魯定妣是也

諫爭不威曰德

盧文弨曰諫爭舊作謀慮訛

孔注不以威拒諫也

補注君不拒諫臣子之幸語曰荷恩為德此之謂也

周僖王時秦寧公子德公謚德

辟地有德曰襄

蜀斷左傳襄公釋文孟子梁襄王疏並作辟土

孔注取之以義

補注周王鄭謚襄王

甲冑有勞曰襄

孔注言亟征伐

補注勞謂有功

有伐而還曰釐

盧文弨曰正義前編伐俱作釐

孔注知難而退

補注有伐而還不窮兵也止戈爲武與民同福故曰
釐釐僖古通用周王胡齊謚僖王春秋齊僖公魯僖
公史記並作釐

質淵受諫曰釐

孔注深故能受

補注良藥苦口利於病忠言逆耳利於行君能受諫
宗社之福也沈濤曰案後漢梁統傳注釐猶改也釐
有改義故受諫曰釐

博聞多能曰憲

盧文弨曰憲舊作獻案正義博文多能曰
憲在良順二謚之後不與獻謚相比近故

今定爲憲前
編亦作博文

孔注雖多能不至大道

正宗補注憲法也漢書古今人表秦憲公史記秦本紀作

寧公二字不通用必有一誤

聰明叡哲曰獻

後漢書孝獻皇帝注引同爾雅釋言郭注
叡哲作睿智獨斷同後漢書桓帝懿獻梁

皇后注引
哲作智

孔注有通知之聰也

補注魯獻公具謚獻漢書景十三王傳河間王德立

二十六年薨中尉常麗以聞曰王身端行治温仁恭

儉篤敬愛下明知深察惠於鰥寡大行今奏謚法曰

聰明睿知曰獻宜謚曰獻王師古曰獻深也通也

温柔聖善曰懿

盧文詔曰正義作賢善獨斷前編皆作聖善衡案論語孟懿子疏引作賢善後漢懿

獻梁皇后注柔作和

孔注性純淑也

補注懿美也周王堅謚懿王

五宗安之曰孝

孔注五世之宗也

補注周王辟方謚孝王禮大傳鄭注小宗四與大宗

凡五正義小宗四謂是繼禰與親兄弟為宗二是
繼祖與同室兄弟為宗三是繼曾祖與再從兄弟為
宗四是繼高祖與三從兄弟為宗是小宗四并繼別
子之六宗凡五也衡案五宗安之則能敬宗收族矣
非孝而何

慈惠愛親曰孝

盧文弨曰孝舊作釐與釐謚一類正義作
孝在五宗句下秉德協時二句之上案慈

惠愛親於孝義為允於釐義太濶
故定從正義移此衡案獨斷作孝

孔注言周愛親族也

補注爾雅釋訓善父母為孝賈子道術子愛利親謂

之孝魏書甄琛傳正光五年卒太常議謚文穆吏部
郎袁翻奏曰案甄司徒行狀至德與聖人齊蹤鴻名
共大賢比跡文穆之謚何足加焉但比來贈謚於例
普重如甄琛之流無不複謚謂宜依謚法慈惠愛民
曰孝宜謚曰孝穆衡案慈惠愛民是文謚愛民當作

愛親

協時肇享曰孝

孔注協合肇始也

始也下盧從舊本有常如
始三字史記正義無今刪

補注能承祭祀不忘遠矣詩曰綏子孝子又曰孝孫

有慶此之謂也

秉德不回曰孝

孔注順於德而不違

補注孝莫大於守身秉順也回邪也秉德不回則其

身正而無忝所生矣故曰孝晉書周處列傳太常賀

循議曰處履德清方才量高出歷守四郡安人立政

入司百僚直節不撓在戎致身見危授命此皆忠賢

之茂實烈士之遠節謚法執德不回曰孝遂以謚焉

大慮行節曰考

考舊訛作孝正義同盧文昭曰案正義此句在威祈二字之後不與孝謚連文而今

本亦作孝此傳寫之訛也公羊隱元年疏引此作考考成也正與注合故定從之

孔注言成其節

補注王謨曰案舊謚無考字而孝字已有四條若以

周本紀考之威烈王之父是為考王則考當在謚法

此當從通鑑注引謚法作考衡案史記燕世家孝公

漢書人表作考公考考二字形近易混周一代有考

王嵬魯有考公就楚有考烈王熊完衛有考伯滕有

考公此解不應無考謚一條

執心克莊曰齊左傳襄二
年疏引同

孔注能自嚴也

補注魯成公妃姜氏謚齊姜襄公妃歸氏謚齊歸論

交刃語叔齊正義齊亦謚也

資輔共就曰齊

分列孔注資輔佐而供成

盧本作有所輔而共成也今從史記正義

補注言其應事接物無缺失也齊有整肅周備之義

豐年好樂曰康

樂音洛下同盧文弼曰豐善作溫正義作溫柔前編作溫良皆訛今依注改衡案後

有溫良好樂曰良一條此處作豐年好樂為是

孔注好豐年勤民事

補注豐年多黍多稌也好樂優游伴兔也周之康王

近之

安樂撫民曰康

左傳傳四年召康公疏論語季康子疏引並同獨斷撫作治

孔注無四方之虞

令民安樂曰康

孔注富而教之

安民立政曰成

漢書孝成皇帝注禮樂志孟康注書顧命馬注左傳文元年疏成公釋文穀梁成公

疏引並同獨斷安仁立政曰神神字誤

孔注政以安之

補注安民立政如周成王是已

布德執義曰穆

獨斷後漢書獻穆皇后注魏源
懷謚議晉蔡司空謚議並同

孔注穆純也

補注周王滿謚穆王布德執義則和而能敬故曰穆

中情見貌曰穆

孔注性公露也

敏以敬順曰傾

盧文弨曰正義順作
慎注同二字本通用

孔注疾於所敬順也

補注案敏以敬順於傾謚不合漢書文帝紀注諸謚

爲傾者漢書例作頃字此謚史記正義亦作頃頃傾
通景十三王傳中山頃王師古曰頃音傾案頃訓衰
邪訓危訓傷俱與此不合後文甄心懼動確是傾字
謚議据通鑑周紀注引敏以敬曰慎又蘇洵嘉祐謚
法有敏事以敬曰慎則此條當是敏以敬順曰慎

昭德有勞曰昭

盧文昭曰昭德前編作明德

孔注能勞謙也

補注周王瑕謚昭王昭明也民功曰勞注以勞謙訓
有勞非

容儀恭美曰昭

盧文弨曰舊本誤昭為勝此條在後園宣二謚之上今案正義本在昭德上前編在

明德下故移補此處後勝一條則削之左氏釋文及正義並引作威儀恭明曰昭衡案穀梁昭公疏亦作恭明

孔注有儀可象行恭可美

補注如魯昭公習於威儀之節是已

聖聞周達曰昭

漢書孝昭皇帝注引同盧文弨曰聞舊作文訛

孔注聖聞通洽也

補注蓋德音孔昭之義

保民耆艾曰胡

獨斷左傳僖二十二年雖及胡耆疏並同

孔注六十曰耆七十曰艾

補注耄而慈惠克享大年故曰胡

彌年壽考曰胡

孔注大其年也

補注詩周頌胡考之寧傳胡壽也儀禮士冠禮眉壽
萬年永受胡福注胡猶遐也通志謚略曰陳胡公滿
者言其老也有胡考之稱焉胡非謚義衡案言其老
正與彌年壽考合姓纂十一模胡氏帝舜之後胡公
封陳子孫以謚爲氏鄭謂胡非謚義誤 欽定續通
志謚略曰史記陳有胡公滿其子爲申公孫爲相公

申與相不列謚法則疑胡公非謚不爲無因然齊有
胡公靜次哀公不辰後哀旣爲謚胡亦是謚矣漢陽
信侯呂清懷昌侯劉延年晉都亭侯華譚梁之王汾
吉士瞻皆用胡謚樵謂特胡耆之稱是其疑古之過
也

彊毅果敢曰剛

史記正義
脫此條

孔注彊於仁義致果曰毅

補注說文剛彊斷也漢棘蒲侯陳武復陽侯陳胥都

昌侯朱率並謚剛

追補前過曰剛

孔注勤善以補過

補注通鑑建武三十年膠通剛侯賈復薨胡三省注

謚法能補過曰剛此直以賈復剛毅而謚之耳趙紹

祖曰余按謚法自有彊毅果敢曰剛胡氏何不引之

乃引此句而自駁之耶

柔德考衆曰靜

盧文弨曰考正義作安非靜作靖本通用下同魏書源懷傳有柔直考終曰靖是相

傳本不同也衡案獨斷考作好靜作靖

孔注成衆使安也

補注 欽定續通志謚略曰古靖與靜通故謚作靖

者皆卽靜字 晉六世靖侯宜曰三十七世靜 又與靚

通周慎靚王卽慎靖王也又或作靖秦文公賜太子

謚爲靖公

恭已鮮言曰靜 鮮上 聲

孔注恭已正身少言而中

補注恭已不妄動鮮言不妄言晉語吾其靜也注靜

而默也

寬樂令終曰靜 樂音洛文選陶徵士 誄注引謚法靜作靖

孔注性寬樂義以善自終

治而無眚曰平

盧文弨曰無青舊作清省非衡案論語晏平仲疏引亦作無青孟子魯平公疏作清

省

孔注無失闕之病也

補注 欽定續通志謚略曰周十三世爲平王於是

陳有平公變至簡王時宋有平公成靈王時晉有平

公彪景王時有杞平公郁釐蔡平公廬楚平王居曹

平公須及燕平公敬王時有齊平公騫戰國時有衛

平侯魯平公則平謹周所習用鄭志以爲義不專而

削之非是

執事有制曰平

孔注不任意也

盧文弨曰有法度檢制故曰不任意舊作在位平意也訛

補注執事有制能絜矩也周語細大不踰曰平冊府

元龜載雲

趙雲

別傳大將軍姜維等議以爲雲昔從先

帝勞績旣著經營天下遵奉法度功效可書當陽之

役義貫金石忠以衛上君念其賞禮以厚下臣忘其

死死者有知足以不溺生者感恩足以殞身謹按謚

法柔賢慈惠曰順執事有班曰平克定禍亂曰平應

謚雲曰順平侯

布綱治紀曰平

獨斷漢書孝平皇帝注引並同盧文昭曰左昭二十二年正義治作持

孔注施之政事

補注詩何彼穠矣疏引鄭志曰德能平正天下則稱

為平

由義而濟曰景

孔注用義而成也

補注景有正大顯鑠之義周王貴謚景王

布義行剛曰景

漢書霍去病傳張晏注引同

孔注以剛行義也

補注春秋考異郵曰景者強也魏書羊祉傳太常少

卿元端博士劉臺龍議謚曰祉志存埋輪不避彊禦

及贊戎律能武斯裁伏節撫藩邊夷識德化沾殊俗

襁負懷仁謹依謚法布德行剛曰景宜謚為景北史

羊祉傳同

清白守節曰貞

唐楊綰謚議同盧文弨曰獨斷守節作白守

大猷孔注行清白執志固也

當作志固執也

補注處亂而不汙其身蒙難而能正其志艱屯之會

有守斯不辱矣故曰貞周王介謚貞王

大慮克就曰貞

白孔注能大慮非正而何

補注大慮克就能以正決疑也故曰貞

不隱無屈曰貞

孔注坦然無私也

猛以剛果曰威

孔注猛則少寬果敢行也

補注欽定續通志謚略曰凡相謚或作威因後人

避諱改也若周威烈王及桓公之子威公齊威王嬰

齊楚威王商則是其本諡非因諱改

猛以彊果曰威

孔注彊甚於剛也

彊毅信正曰威

盧文弨曰正義作彊義執正

孔注信正言無邪也

辟土服遠曰桓

漢書霍去病傳注左傳桓公釋文毅梁桓公疏引並同

孔注以武正定

克敬勤民曰桓

後漢書桓帝紀注作克敬

孔注敬以使之

辟土兼國曰桓

獨斷

孔注兼人故啟土

補注桓威武也通志謚族略曰案謚法惡謚其次莫如桓靈桓於經典並無惡義齊之桓公用能霸業周之桓王元無累行安得為惡名乎

道德純一曰思

孔注道大而德一也

補注周王叔謚思王書堯典馬注欽明文思俱用謚

法解鄭注明文二義用謚法其敬事節用謂之欽慮
深通敏謂之思則又雜取他義然以此證堯典文思
孔馬鄭三家所傳本俱是思字與謚法解同後漢書
邳壽傳注引鄭注考靈耀云道德純備謂之塞塞卽
塞思與塞聲之轉

大省兆民曰思

孔注大親民而不殺

補注寒則爲民思衣飢則爲民思食貧則爲民思富
足鰥寡孤獨則爲民思存活偷惰縱佚則爲民思教

化是皆大兆省民之事

外內思索曰思

孔注言求善也

大省補注外謂國內謂身索求索也

追悔前過曰思

孔注思而能改也

補注此即論語內自訟之義前追補前過曰剛剛在

補字上看此思義在悔字上看

柔質受諫曰惠

惠盧本作慧

孔注以虛受人

補注周王涼謚惠王案爾雅釋言惠順也故質柔而
能受諫者曰惠

能思辨衆曰元

孔注別之使各有次也

補注周王赤謚元王案元者首出之謂也能思辨衆
則能知人能知人則能官人矣故曰元

行義說民曰元

說音悅漢書孝元皇帝
注引同獨斷行作仁

孔注民說其義

始建國都曰元

盧文弨曰左傳昭十年正義始作好

孔注非善之長何以始之

補注爾雅元始也造端伊始立我不基故曰元

主義行德曰元

孔注以義為主行德政也

補注主義疑作主善注同周語衆非元后何戴晉語

人之有元君章昭注並云元善也主善行德則能長

人故曰元

兵甲亟作曰莊

孔注以數征爲嚴

補注周王它謚莊王漢避明帝諱故人表莊作嚴然
二字亦可相通故孔注以數征爲嚴非嚴何以死難
以嚴釐之三謚義俱以嚴字相替王景世不後爾不
畝圍克服曰莊

孔注通邊圍使能服也

死於原野曰莊

孔注非嚴何以死難

補注不辱社稷不辱宗廟以身殉焉可謂莊矣

屢征殺伐曰莊

孔注以嚴釐之

補注傳曰殺敵致果以昭戎經

武而不遂曰莊

孔注武功不成

補注此乃止戈為武之義如楚莊王是也不遂謂不

窮兵耀武也孔解非

克殺秉政曰夷

孔注秉政不任賢也

補注夷傷也滅也誅也以殺為政慘莫大焉是故周

王變以紀侯之譖而烹齊哀侯不辰於鼎故有斯謚

安民好靜曰夷

好去聲安民舊作安心史記正義同盧文弨曰左氏僖二十八年正義引作安民好

靖僖十五年

正義民作人

孔注不爽正也

補注夷平也論語伯夷正義夷謚又見孟子疏好名

之人章案克殺秉政為惡謚此安民好靜為平謚

執義揚善曰懷

獨斷同史記正義懷作德通鑑漢紀注引作執義行善曰德

孔注稱人之善

補注春秋時晉有懷公圍陳有懷公柳爾雅釋詁懷
止也止於義故執義詩周頌注懷來也能來衆善故

揚善

慈仁短折曰懷

後漢書章德實皇后謚恭懷
注引謚法慈仁折行曰懷

孔注短未六十折未三十

注有訛說見短
折不成曰殤下

補注其德在人而無大年之享故黎民懷之

夙夜警戒曰敬

孔注敬身思戒

補注周王句謚敬王詩常武既敬既戒箋敬之言警

也釋名敬警也恒自肅警也

夙夜恭事曰敬

史記正義此條魏書于忠謹議引同左傳宣八年疏引恭事作敬事宋本作勤事

昭二十二年疏引恭作共

孔注敬以莅事也

補注周禮小宰康敬注敬不解於位也

象方益平曰敬

史記正義脫此條

孔注法之以常而加敬也

敬義補注象方益平地道也地屬坤坤道主敬

合善法典曰敬

合善盧本作善合

孔注非敬何以善之

述義不克曰丁

孔注不能成義

補注說文齊大公子伋謚曰玆公段玉裁曰齊世家

古今人表皆云師尚父之子丁公丁公之子乙公乙

公之子癸公猶之魯禽父晉夔父衛康伯宋微仲皆

無謚不聞謚丁也此當云讀若齊大公子伋謚曰丁

公邵瑛曰玆公今經典作丁左昭三年傳徼福於太

公丁公十二年傳杜注呂伋齊大公之子丁公逸周

書謚法解述義不克曰丁迷而不克曰丁據說文當作玎梁玉繩曰通志氏族略云謚法雖始有周是時諸侯猶未能遍及齊五世後稱謚則知所謂丁公者長第之次也鄭說是杞宋曹蔡四世未稱謚衛亦五世後稱謚而宋並有丁公可驗已說文以攸謚玎非又謚法述義不克曰丁呂伋賢嗣何以蒙此不韙之名乎沈濤曰蓋古文左傳作玎公故許偁之猶墮淫于家我之弗辨許書引經之例如此非必謂其字之本義也又曰丁公之丁假借作玎猶泰丙之丙假借

作尚古書往往有此衡案丁義自是謚法中所有齊
丁公之後爲乙公癸公是襲用殷法若宋丁公申之
後爲煬公閔則丁是謚法無疑且合觀全謚周一代
未用者甚多使必盡有證而後爲謚義似未免拘虛
之見魏書穆崇爲太尉又徙宜都公天賜三年薨先
是衛王儀謀逆崇預焉太祖惜其功而秘之及有司
奏謚太祖親覽謚法至述義不克曰丁太祖曰此當
矣乃謚曰丁公北史穆崇傳同又廣韻十五音丁本
自姜姓丁氏齊太公子伋謚丁公因以命族據斯二

說則丁爲謚義所有明矣

述義不悌曰丁

史記正義脫此條盧從前編改作述而不悌

孔注不悌不遜順也

補注丁有強壯盛大義故不悌前云述義不克謂紹

述前業而不克肖其父不克二字非貶辭此述義不

悌亦謂能述前業而有用壯之象也

有功安民曰烈

孔注以武立功

補注烈功也周王喜謚烈王

秉德遵業曰烈

後漢書光烈陰皇后麗華注引
秉作執又順烈梁皇后注引

孔注遵世業不墮改

補注爾雅釋詁烈業也唐書盧奕列傳天寶十四載
安祿山犯東都人吏奔散奕在臺獨居爲賊所執與
李澄同見害贈兵部尙書太常議謚博士獨孤及議
曰謹案謚法圖國忘身曰貞秉德遵業曰烈奕執憲
戎馬之間志藩王室可謂圖國國危不能拯而繼之
以死可謂忘身歷官一十任言必正事必果而清節
不撓去之若始至可謂秉德先黃門以執道佐時奕

嗣之忠純可謂遵業請謚曰貞烈從之

剛克為伐曰翼

通鑑晉紀注翼作肅

孔注伐功也

補注後漢關內侯陰興謚翼

思慮深遠曰翼

通鑑周紀注引戴記思慮深遠曰慎

孔注好遠思任能也

補注翼有敬義故思慮深遠

剛德克就曰肅

孔注成其敬使為終

補注春秋時趙侯語楚子臧謚肅御覽唐獨孤及謚

呂諲曰肅嚴郢駁曰國家故事宰臣之謚有二字以

彰善旌德焉夫以呂公文能無害武能禁暴貞則幹

事忠則利人盛烈宏規不可備舉傳敘八元之德曰

忠肅恭懿若以美謚擬于形容請曰忠肅及重議曰

謚法在懲惡勸善不在多字肅者威德克就之名威德

冊府元龜以諲之從政威能閑邪德可濟衆故以肅作盛德

易名而忠在其中矣姓氏書辨證一屋引姓源韻譜

肅氏八元仲堪謚肅後世爲氏又姓纂一屋肅氏周

文王子邴叔之後成肅公以謚為氏

執心決斷曰肅

南史徐勉傳同

孔注言嚴果也

憂民好治曰戴

孔注好民治也

補注曹八世有戴侯鮮急就章注戴氏宋戴公子文

以謚為氏

典禮不悞曰戴

悞舊作愆今從前編盧本從史記正義作寒云音義並同沈濤曰觀下文悞過也則

當從前編為是悞即愆字之假寒乃悞字之誤說文寒寔也音讀如寒與愆義異

孔注無過

死而志成曰靈

孔注立志不夭命也

補注鄭氏通志謚略謂靈非惡謚衡案周書靈謚六

條俱不甚惡蓋平謚也水經洛水注周靈王蓋以王

生而神故謚曰靈

亂而不損曰靈

獨斷左傳文元年疏襄十三年注楚語請為靈若厲注後漢書孝靈皇帝注引並同

孔注不能以治損亂

補注亂如禮煩則亂之亂損傷也失也左傳襄二年

君子是以知齊靈公之爲靈也注謚法亂而不損曰
靈言謚應其行

極知鬼事曰靈

孔注其智能聰徹也

不勤成名曰靈

孔注任本性不見賢思齊

此與不勤名不合蓋靈謚下脫去孔注此注又脫

去正文遂連接而義各別矣

補注鄧立誠曰按後漢書高陽公鄭義卒尙書奏謚

曰宣詔曰義雖宿有文業而治闕廉清依謚法博聞

多見曰文不勤成名曰靈可謚文靈衡案宋司徒岐
國公陳執中謚議韓維曰謚法寵祿光大曰榮不勤
成名曰靈執中出入將相以一品就第寵祿光大矣
得位行政賢士大夫無述焉不勤成名矣請謚曰榮
靈

死見鬼能曰靈

鬼盧本作神

孔注有鬼爲厲

盧本作不爲厲

好祭鬼神曰靈

孔注敬鬼神不能遠也

盧本作瀆鬼神不敬遠也

短折不成曰殤

獨斷

孔注有知而夭殤也

補注晉穆侯殤叔宋公與夷並謚殤儀禮喪服傳年

十六至十九死爲長殤十二至十五爲中殤八歲至

十一死爲下殤七歲以下爲無服之殤生未三月不

爲殤釋名釋喪制未二十而死曰殤殤傷也可哀傷

也衡案前慈仁短折曰懷孔注短未六十折未三十

當在此處六十當作十六三十當作十三蓋謂長殤

中殤也若年未六十去下壽不遠焉得爲短洪範六

極一曰凶短折短為上殤折為下殤

未家短折曰殤

盧文弨曰正義殤作傷不與上條相連

孔注未家者未室家也

補注此指長殤言鹽鐵論十九年已下為殤

不顯尸國曰隱

盧文弨曰左傳釋文作不尸其國

孔注以閻主國也

補注魯侯息姑謚隱公 欽定續通志謚略曰隱與

偃同用故徐隱王亦稱徐偃王

隱拂不成曰隱

穀梁隱公疏引同盧文弨曰春秋傳隱拂同前編作隱括獨斷又作違拂

孔注言以隱拂改其性也

補注如魯隱公欲傳位桓公將營菟裘而卒見殺可

哀痛也

中年早天曰悼

舊作年中史記正義同今從前編獨斷作中身早折曰悼

孔注年不稱志

補注周王猛謚悼王年不稱志如晉悼公是也据獨

斷中年作中身蓋年未五十之謂漢書平帝傳云悼

者未成爲人於其死亡可哀悼也

肆行勞祀曰悼

盧文昭曰穀梁定元年疏引作肆行勞神曰場

孔注縱於心勢於淫祀言不修德也

縱於心虛
本作放心

恐懼從處曰悼

孔注從處言險圯也

補注說文悼懼也陳楚謂懼曰悼晉語隱悼播越注

悼懼也從當作聳左傳駟氏聳聳亦懼也

不思忘愛曰刺

刺音辣

孔注忘其愛已者也

補注說文刺戾也漢燕王劉旦長沙王劉建德利昌

侯劉殷當塗侯魏楊宜城侯燕安汜鄉侯何武平阿

侯王仁並謚刺又唐中書侍郎高璩卒太常博士曹
璞建言璩為相交遊醜雜謚法不思妄愛曰刺請謚
為刺案妄與忘通

復佞遂過曰刺

孔注去諫曰復反是曰佞

外內從亂曰荒

盧文弼曰前編從作縱

孔注官不治家不理

補注書五子之歌內作色荒外作禽荒傳迷亂曰荒

漢成王劉順梁王劉喜朝陽侯劉聖什邡侯雍鉅鹿

舞陽侯樊市人建平侯杜業紅陽侯王立並謚荒

好樂怠政曰荒

好去聲樂音洛漢書諸侯王表注引荒作禱

孔注淫於聲色怠於政事

在國逢難曰愍

難去聲獨斷同史記正義作逢艱左傳閔公釋文作遭難疏作逢難穀梁閔公疏同

孔注逢兵寇之事也

補注愍憂也痛也

欽定續通志謚略曰古愍與閔

通故凡春秋謚閔者皆即愍也又與潛通史記宋閔

公魯閔公皆作潛三字寔一義又南宋以後兼用憫

字宋張廷堅紹興時追謚節憫遼托卞嘉道宗時謚

貞憫衡案人表宋愍公作敏公

使民折傷曰愍

盧文弨曰折正義前編作悲非

孔注苛政賊害

在國連憂曰愍

盧文弨曰正義前編連作遭非注仍正釋連字

孔注仍多大喪

禍亂方作曰愍

孔注國無政動長亂

蚤孤短折曰哀

孔注蚤者未知人事

補注周王去疾謚哀王

恭仁短折曰哀

漢書孝哀皇帝注左傳哀公釋文穀梁哀公疏論語哀公問曰疏引並同獨斷仁作

人

孔注體恭質仁功未施也

蚤孤鋪位曰幽

孔注鋪位卽位而卒也

補注幼而孤露嗣位卽病故曰鋪位詩江漢淮夷來

鋪傳鋪病也

壅遏不通曰幽

獨斷同呂覽審分篇注引遏作過誤

孔注弱損不凌也

此蓋另一條注非注壅遏不通也其幽謹下脫去孔注而損弱不凌

又脫去正文一條與前不成動名下注同

補注通志謚略曰幽者隱之並名也周幽王喪於犬

戎之禍魯隱公卒於羽父之難皆臣子所不忍言故

以幽隱命之痛惻之甚也豈有擁遏不通之義衡案

以魯隱公與周幽王並舉不合易幽人貞吉幽囚也

與壅遏不通義近

動祭亂常曰幽

左傳宣十年疏祭作靜

孔注易神之班

補注書說命黷於祭祀時謂弗欽禮煩則亂事神則難是其義也

克威捷行曰魏

孔注有威而敏行

補注方言魏能也史記魯世家有魏公漢人表同左傳文十六年疏引世家作微公釋文云世本作微公漢律歷志及集解索隱引世本皆作微公

克威惠禮曰魏

孔注雖威不逆禮也

去禮遠正曰煬

正舊作衆獨斷同
今從史記正義

孔注不率禮不親長

補注周穆王時魯有煬公懿王時宋有煬公並名熙

好內怠政曰煬

孔注好內多淫外則荒政

此注舊在去禮遠正下注
義與正文不合檢定元年

正義蘇洵謚法前編俱有好內怠政一條正與此
注合今從盧本而移好內遠禮一句于補遺條內

補注南史蕭機字智通位湘州刺史薨于州機美姿

容善吐納家既多書博學強記然而好弄尙力遠士

子邇小人爲州專意聚斂無政績頻被案劾將葬有

司請謚詔曰王好內怠政宜謚曰煬

甄心動懼曰頃

孔注甄積也

史記正積作精

補注周王士臣謚頃王頃與傾通危也甄猶掉也心

轉掉故動而兼懼

威德剛武曰圉

盧文弨曰史表六索隱剛作強

孔注圉禦也能禦亂患也

補注漢高陵侯王虞人謚圉

聖善周聞曰宣

獨斷漢書孝宣皇帝注引並同後漢書朱穆傳注引作善聞周達左傳宣公釋文穀

梁宣公疏孟子齊宣王疏引並作善
問周達皆與前謚聖聞周達曰昭混

孔注聞所未聞善事也

補注宣通也周王靖謚宣王

治民克盡曰使

盧文弨曰舊本使作空圍案正義前編明允並作使今據補

孔注克盡無恩惠也

行見中外曰愨

孔注言表裏如一也

補注愨謹實也漢有祁穀侯繪賀史記索隱曰謚法

行見中外曰穀衡案穀字誤當作愨又蘇洵嘉祐謚

法有行見中外曰敵敵字亦誤嘉祐謚法又有行見
中外曰顯通鑑周紀注亦有之胡三省謂是傳寫謚
法者遺之案此條既為愨謚何得又為顯謚傳顯謚

者亦疑有誤

勝敵壯志曰勇

孔注不撓折

補注唐高祖時絳州總管羅士信謚勇

昭功寧民曰商

孔注明有功也

補注商章也張也藏珠玉不如富饑糧厚倉箱不如
課農桑商之爲言商也故王者以富民爲要

狀古述今日譽

孔注立言之稱

補注博通今古名譽斯彰春秋時子產叔向晏子可

以當之

心能制義曰度

孔注制事得宜

補注左昭二十八年傳詩皇矣帝度其心傳並云心

能制儀曰度服虔曰心能制事使得其宜言善揆度
事也魯語咨義為度

好和不爭曰安

孔注失在少斷

盧文弨曰正義作生而少斷衡案俱與正文不合蓋好和不爭下失去孔

注而失在少斷上又脫去正文謚法一條故兩不連接

補注周王駿謚安王

外內貞復曰白

孔注正而復始終一也

補注晉陶宏景謚貞白先生

不生其國曰聲

左傳隱元年疏引同

孔注生於外家

補注孳經室文集曰逸周書謚法解不生其國曰聲

昔人解此多誤案此乃生於母家不在本國如虛懸

然然其義猶在殼字聲乃假借耳猶史記所云贅壻

之義魯嬰齊謚聲伯聲伯之母不聘穆姜不以爲妣

生聲伯而出之嫁於齊

左成十一年傳

然則聲伯必是隨母

生長於外所以卒謚曰聲又齊侯娶魯顏懿姬無子

其姪鬻聲姬生光

杜注云顏鬻皆二姬母姓

姬之謚聲亦必育于

母駸姓家之故故以母姓為名而謚曰聲

左襄十
九年傳與

嬰齊聲伯同例而隱公母謚聲僖公夫人聲姜齊靈

母聲孟子皆同此例矣衡案衛世家聲公索隱云世

本作聖公據廣韻引風俗通聖者聲也則聖聲二字

可通 欽定續通志謚略曰魯聲伯之母不聘因謚

為聲然曹有聲公野鄭有聲公勝蔡有聲公產楚有

聲王當衛有聲公訓列國大夫謚聲者尤多豈盡不

生其國者意聲謚或兼聲聞之義而周書流傳日久

不無闕漏乃僅傳不生其國一義其義亦太專矣

殺戮無辜曰厲

左傳襄十三年注楚語請為靈若厲注呂覽審分唐于頓謚議引無俱作不

孔注賊良善人

補注厲惡也虐也周王胡謚厲王

官人應實曰知

孔注能官人也

補注官人應實則能進賢退不肖矣故曰知古知智

通

凶年無穀曰穰

棟史記正義作荒

孔注不務稼穡

補注盧文弨曰漢書諸侯王表有中山糠王昆侈則
謚法之有稊明矣師古注引好樂怠政曰糠則與前
荒之謚相同正義此糠字亦作荒案美謚中有豐年
好樂曰康此糠字之惡謚正與相反糠之爲言虛也
注以不務稼穡爲言可謂深得制謚之旨師古所引
或誤記耳衡案稊訓虛荒亦訓虛說見後糠虛也下
名實不爽曰質

孔注不爽言相應也

補注質信實也後謚名與實爽曰繆正與此相反漢

棘陽侯杜但謚質

不悔前過曰戾

孔注知而不改

補注漢戾太子謚戾韋昭注以違戾擅發兵故謚曰

戾唐楊綰謚議漢宣不敢私於祖謚曰戾

温良好樂曰良

好去聲樂音洛案温良當作温柔

孔注言其行可好可樂也

補注良善也唐太宗時皇甫無逸長孫敞並謚良

恬威肆行曰醜

孔注肆意行威

補注御覽五百六十二引干寶晉紀曰何曾卒下禮
官謚博士秦秀議曰曾資性驕奢不脩軌則奕世以
來宰臣輔相未有受詬辱之聲被有司之劾父子塵
累而蒙恩貸若曾者也謹案謚法名與實爽曰繆怙
威肆行曰醜曾宜謚爲繆醜魏書于忠薨太常少卿
元端議曰忠剛直猛暴專驕好殺案謚法剛彊理直
曰武怙威肆行曰醜宜謚武醜又三國魏志吳質先
以怙威肆行謚曰醜

勤施無私曰類

盧文弨曰舊作勤政前編同正義作施勤今從左氏案此兩條及下美謚當本在前

不與惡謚雜廁今皆紛亂難以考而復矣

孔注無私惟義所在

補注左昭二十八年杜注施而無私物得其所無失

類也正義曰勤行施惠情無徧私物皆得所是無失

類也曲臺奏議五代鄂州刺史劉敬文謚類

好變動民曰躁

孔注數移徙也

補注躁擾也燥也漢書古今人表秦躁公史記索隱

作趨薛傳均曰說文無躁字當作趨彙與參偏旁古
書多混用鄧立誠曰按漢書王子侯年表清河綱王
子東昌趨侯成確是趨字衡案晉灼曰音躁疾師古
曰卽古躁字也功臣表有陽都趨侯丁甯師古曰趨
古躁字也北史景穆十二王傳任城王世儁位尙書
令輕薄好去就興和中薨謚曰躁疾案輕薄好去就
與好變動民義近

慈和徧服曰順

後漢書孝順
皇帝注引同

孔注能使人皆服其慈和

補注左昭二十八年服注上愛下曰慈和中和也為
上而愛下行之以中和天下徧服而順之杜注唯順
故天下徧服正義曰人君執慈心以惠下用和善以
接物則天下徧服而從順之故為順也

滿志多窮曰惑

惑盧本作惑下注云正義前編俱作惑非也惑古憾字注與憾之義正合

孔注自足者必不足也

補注案後周有陳惑王宇文純盧改作感非也

危身奉上曰忠

孔注險不辭難也

補注事君能致其身故曰忠漢燁渠侯僕明謚忠

思慮果遠曰趕

盧文弨曰舊本果作深前編同云趕恐當作悍正義作明訛

孔注自任多近於專

補注案趕乃追趕之義字同趕說文趕舉尾走也義與思慮果遠不合舊作深遠亦誤案思慮深遠已爲翼謚通鑑周紀注引戴記翼作慎此不得又云趕也蘇洵嘉祐謚法有意深慮遠曰趕案趕與蹕同亦與意深慮遠不合舊本曰下一字空 欽定續通志謚略曰曰下字各本周書俱闕史記正義作思慮果遠

曰明註云自任多近於專與周書同玩注意係別釋
一字係不美之謚非釋明字知史記明字亦誤明王
圻謚法考引會編載有思慮深遠曰捍句與注意稍
近

怠政外交曰攜

盧文弨曰正義脫此條舊本攜
作推前編同今從獨斷改正

孔注不自明而恃外也

補注左昭二十六年傳攜王好命杜預曰攜王幽王
少子伯服也正義曰以本非適故稱攜王衡案紀年
幽王十一年立王子余臣于攜注是為攜王則攜王

是余臣非伯服也且以立于攜故稱攜王亦如厲王
稱汾王左傳晉翼侯鄂侯之類非謚法所謂攜也正
義本非適之說不可據冊府元龜邵陵王綸爲西魏
軍所敗死於汝南岳陽王督遣迎喪葬於襄陽望楚
山南贈太宰謚曰安後元帝追議加謚尙書左丞劉
穀議謚法怠政交外曰攜從之
衡案邵陵攜王綸追謚事見南史梁武帝
諸子列傳鄧立誠曰漢書功臣表有容臣攜侯徐盧

疏遠繼位曰紹

一切經音義
二十三引

孔注非其次第偶得之也

補注漢有汲紹侯公上不害

彰義掩過曰堅

孔注明義以蓋前過

補注漢有臨轅侯成鯁謚堅

肇敏行成曰直

孔注始疾行成言不深也

補注漢王根謚直道讓公

內外賓服曰正

左傳昭十年正義引正作平

孔注言以正服之

補注正治也後漢有節鄉正侯趙熹

華言無實曰夸

孔注恢誕

盧文照曰疑有脫字衡案此注舊作空方五

補注夸大也張也虛也唐沙門一切經音義卷十一

引謚法華言無實曰誇也又卷十五引謚法華言無

實曰誇誇相誕也謂憍恣過制自夸大也又卷十七

引謚法華而無實曰誇也又卷二十三引謚法華而

無實曰誇

教誨不倦曰長

長上聲

孔注以道教之也

補注詩皇矣克長克君箋禮樂記克長克君注並云
教誨不倦曰長左昭二十八年服注教誨人以善不
懈倦言善長以道德也杜注教誨長人之道

愛民在刑曰克

孔注道之以政齊之以刑

補注克勝也能也漢有隆慮克侯周竈史表作哀侯
嗇于賜與曰愛

孔注言貪嗇也

補注魯語人以其子爲吝注愛吝也孟子百姓皆以
王爲愛也注愛奮也史記魏其武安侯傳豈以臣爲
有愛索隱愛猶惜也皆與此義近漢成安侯郭遷謚
愛

逆天虐民曰抗

孔注所尊天而逆天

補注國策宋康王射天笞地斬社稷而焚滅之剖偃
者之背鏃朝涉之脛是其證也案抗讀康見後漢書
班彪傳又禮明堂位崇坫康圭康卽抗

好廉自克曰節

文選陶徵士諫法引謚法同冊府元龜五百九十五自克作自競

孔注自勝其情欲也

補注漢闕氏侯馮解散謚節

擇善而從曰比

孔注比方善而從之

補注禮樂記克順克俾注擇善從之曰比服虔曰比

方損益古今之宜而從之也左昭二十八年擇善而

從之曰比比注比方善事使相從也

好更改舊曰易

漢諸侯王表江都易王非師古引謚法改作故又景十三王傳江都易王非注引亦

故作

孔注變故改常

補注周顯王時燕有易王

名與實爽曰繆

繆眉救切唐許敬宗謚議引同獨斷名實過爽曰繆

孔注言名美而實傷

補注繆誤也史記蒙恬傳蒙毅曰昔者秦穆公殺三

良而死罪百里奚而非其罪故立號曰繆風俗通皇

霸篇繆公殺百里奚以子車氏為殉故謚曰繆據此

則繆當讀如繆然繆穆實通用禮坊記陽侯殺繆侯

而竊其夫人釋文繆音穆公羊傳葬宋繆公釋文繆
音穆又論衡福虛篇亦云秦穆公穆者誤亂之名衡
案秦繆公之繆與蔽仁傷善義近漢書楚元王傳劉
德薨賜謚繆侯師古曰繆惡謚也 欽定續通志謚
略曰古繆與穆通故史記曹繆公燕繆侯秦繆公魯
繆公凡作繆者皆本謚穆至唐謚封倫裴延齡爲繆
乃取名與實爽之義

思慮不爽曰愿

孔注不差所思而得也

補注愿謹厚也。欽定續通志謚略曰古字愿原同。故此謚周書作愿蘇洵謚法作原漢王子侯表劇侯。錯山侯國柴侯代修市侯寅景成侯雍棗侯山皆謚。原箕侯文謚愿顏師古曰愿音願又音原蓋漢時兩字通用。

貞心大度曰匡 獨斷

同

孔注心正而用察少

補注爾雅釋言匡正也案匡亦包有廓大義在故貞心大度曰匡周王班謚匡王

施德爲文

盧本作施爲文也今從史記正義又此條上舊有隱哀也三字今移在和會也上

除惡爲武

盧本作除爲武也今從史正義又此條下有除惡二字注案正義自隱哀也以下俱無注今刪

辟地爲襄

服遠爲桓

剛克爲發

史記正義發作僖而無柔克履正有過三句

柔克爲懿

履正爲莊

有過爲僖

施而不成爲宣

惠無內德為獻獻盧本作平

孔注無內德惠不成也

治而生膏為平

亂而不損為靈

由義而濟為景

補注自施德為文以下十三條疑非周書所有故多

重複或出大戴或出世本或出劉熙均未可知蓋後

人掇拾附之久而遂不復辨也

失志無轉則以其明餘皆象也

盧文昭曰前編失志無轉一作失志無傳正義無失

志以下
八字

孔注以其明所及為謚象謂象其行事也

盧本作以其所為謚

象其行事也史記正義無注案以其明所及為謚者明如白虎通日未出而明之明生而有號死則以其餘光所及定為美謚或曰明當作名所謂大行受大名細行受細名是也

補注此條當緊接貞心大度曰匡下蓋總結上文之

辭

隱哀也

舊作隱哀之也盧本從前編作隱哀之方又多景武之方也一句今從史記正義舊在貞心大度曰

匡下今
移置此

補注以下俱釋篇內字義隱哀聲之轉廣雅釋詁

哀也急與隱通此釋不顯尸國曰隱隱拂不成曰隱
之義

和會也

補注此旁釋好和不爭正德應和慈和徧服之義

勤勞也

補注爾雅釋詁勤勞也漢書景十三王傳泗水戴王
薨立煖是為勤王師古曰勤謚也此旁釋學勤好問
克敬勤民不勤成名勤施無私之義

遵循也

大補注爾雅釋詁遵循也此旁釋秉德遵業之義

爽傷也

補注廣雅釋詁爽傷也此旁釋純行不爽名與實爽

思厚不爽之義

肇始也

補注爾雅釋詁肇始也此旁釋協時肇享肇敏行成

之義

又治也

史記正義無正

補注爾雅釋詁又治也此字周書無蓋傳謚法者失

之

康安也

史記正義無

補注爾雅釋詁康安也此釋豐年好樂曰康安樂撫

民曰康令民安樂曰康之義

怙恃也

補注爾雅釋言怙恃也此旁釋怙威肆行之義

享祀也

補注爾雅釋言享祀也此旁釋協時肇享之義

胡大也

此兩節釋胡大也此旁釋表飾盛華之義

補注廣雅釋詁胡大也此釋保民耆艾曰胡彌年壽
考曰胡之義

服敗也

史記正義無

補注此旁釋刑民克服辟土服遠叡圉克服慈和徧
服內外賓服之義盧文弨曰疑是伏也衡案服當作
伐春秋說題辭伐者涉人國內行威有所斬壞伐之
爲言敗也篇中有伐而還屢征殺伐剛克爲伐凡三

見

秉順也

盧文弨曰秉舊作康案康安也已見前今從正義

補注此旁釋秉德不回克殺秉政秉德遵業之義

就會也

補注就之為言成也會如周禮歲會之會此旁釋資

輔供就大慮克就剛德克就之義

愆過也

補注愆與愆同說文十篇愆過也此旁釋典禮不愆

之義

錫與也

補注爾雅釋詁錫與也此旁釋錫民爵位之義

典常也

補注爾雅釋詁典常也此旁釋合善法典典禮不悞之義

肆放也

補注左昭二十三年伯父若肆大惠注肆展放也此旁釋肆行勞祀怙威肆行之義

穰虛也

穰史記正義作康

補注廣雅穰謂之穉案穰通作漣爾雅釋詁漣虛也說文漣水虛也穰又通作康小雅賓之初筵酌彼康

爵穀梁襄二十四年傳四穀不生謂之康皆謂虛也
又通作荒大雅召旻云我居圉卒荒鄭箋荒虛也又
通作康歎方言康空也郭注康良空貌康或作敷虛
也此釋凶年無穀曰糠之義

叡聖也

補注叡與睿同書洪範思曰睿睿作聖廣雅釋言睿
聖也此旁釋威彊叡德聰明叡哲叡圉克服之義

惠愛也

補注書臯陶謨安民則惠傳詩北風惠而好我傳並

云惠愛也此釋柔質慈民曰惠愛民好與曰惠之義
綏安也

補注爾雅釋詁綏安也此解無綏字知篇內多有缺
落今不可考矣

堅長也

補注廣雅釋詁堅長也此釋彰義掩過曰堅之義
耆彊也

補注廣雅釋詁耆彊也此旁釋保民耆艾之義案史
記正義耆意大慮下注正用此義

考成也

補注爾雅釋詁考成也此釋大慮行節曰考之義

周至也

補注廣雅釋詁周至也此旁釋聖聞周達聖善周聞之義

懷思也

補注爾雅釋詁懷思也此釋執義揚善曰懷慈仁短折曰懷之義

式法也

補注廣雅釋詁式法也式字亦不見此解

敏疾也

補注說文敏疾也此旁釋敏以敬慎肇敏行成之義

捷克也

史記正義無

補注左莊八年傳捷吾以女為夫人注捷克也衛世

家有庚伯世表作捷類篇作捷蓋即捷也索隱引世

本作摯人表及衛詩譜引史作建並誤此旁釋克威

捷行之義

載事也

補注小爾雅廣詁載事也案周書無載字載當作戴
釋名戴載也二字通用

彌久也

補注小爾雅釋詁彌久也此旁釋彌年壽考之義○
案史記正義全寫周書謚法其爲今本所不載者盧
本悉補於周書篇內然序列未必盡合周書之舊茲
特補於篇末而獨斷及兩漢史注等書所錄不見於
周書者亦依次采入其錄及左公穀正義與論孟正
義者以注經所用當用古謚法也

忠信接禮曰文

左傳文公釋文

綏柔士民曰德

史記正義

安民以居安士以事

史記正義

忠和純淑曰德

後漢書明德馬皇后注

因事有功曰襄

左傳襄公釋文。襄公疏。穀梁襄公疏。孟子梁襄王疏。

小心畏忌曰僖

獨斷。史記正義。左傳隱五年疏。僖公釋文。穀梁僖公疏。

思所當忌

史記正義

有功安人曰憲

後漢書和憲鄧皇后注

知質有聖曰獻

史記正義。左傳昭公二十二年疏

有所通而無蔽

史記正義

溫柔好樂曰康

史記正義

聲聞宣遠曰昭

獨斷

者意大慮曰景

史記正義

者強也

史記正義

致志大圖曰景

獨斷

內外用情曰貞

左傳

檀弓貞惠文子疏。

克敵服遠曰桓

後漢書孝桓皇帝注

謀慮不愆曰思

後漢書安思閔皇后注

柔質慈民曰惠

史記正義。漢書孝惠皇帝注

知其性

史記正義案注與正文不合疑有脫誤

愛民好與曰惠

獨斷。史記正義。左傳隱元年疏。孟子梁惠王疏。

與謂施

史記正義

勝敵志強曰莊

史記正義

不撓故勝

史記正義

好勇致力曰莊

獨斷

勝敵克壯曰莊

左傳莊公疏。穀梁莊公疏。左傳莊公釋文莊作亂

夙興夜寐曰敬

獨斷

見美堅長曰隱

史記正義

美過其令

史記正義

暴戾無親曰刺

漢書武五子傳注

好內遠禮曰煬

史記正義

朋淫於家不奉禮

史記正義

祗動追懼曰頃

左昭八年疏

寬容和平曰安

後漢書孝安皇帝注

暴虐無親曰厲

獨斷案此與暴戾無親曰刺同

忠正無邪曰質

後漢書孝質皇帝注

慈仁和民曰順

獨斷

柔賢慈惠曰順

冊府元龜載雲別傳姜維議引謚法

蔽仁傷善曰繆

漢書景十三王傳廣川繆王齊注十一以上諸謚所用字俱見周書

賞慶刑威曰君

史記正義以下諸謚所用字周書不載

能行四者

史記正義

從之成羣曰君

史記正義

民從之

史記正義

治典不殺曰祁

史記正義。盧文弨曰獨斷作祈一作震左氏莊六年正義引經典不易曰祁

秉常不衰

史記正義

正德應和曰莫

史記正義

正其德應其和

史記正義

翼善傳聖曰堯

白虎通引禮記謚法。獨斷。史記集解。論語堯曰疏。

仁聖盛明日舜

白虎通引禮記謚法。獨斷。史記集解。論語堯曰疏引作仁義中庸疏同。

受禪成功曰禹

史記集解。中庸其斯以為舜乎疏引。受禪成功曰舜。姓纂九虞引風俗通。

禹氏夏禹之後以謚為氏

除殘去虐曰湯

史記集解。史記正義。白虎通湯死後稱成湯以兩言為謚也。廣韻十一

唐湯氏殷湯之後以謚為氏

賊人多殺曰桀

史記集解。獨斷作殘人多壘。

殘義損善曰紂

獨斷。史記集解。

善行不怠曰敦

史記王子侯年表臨樂敦侯劉光索隱引謚法

能紹前業曰光

漢書光武皇帝注

溫克令儀曰章

漢書孝章皇帝注

不剛不柔曰和

漢書孝和皇帝注

正德美容曰和

漢書孝和皇帝注

幼少在位曰冲

司馬彪曰冲幼早天故謚曰冲

景武也

史記正義

布施也

史記正義

按春秋時周有顯王赧王鄭有繻公此繻公是幽公之弟非成公庶

兄繻宋有休公辟公陳有申公相公利公蔡曹俱有宮

伯燕有鄭公晉衛秦杞俱有出公俱謚所未載又漢

所用謚如膠西子王之于清河綱王之綱周呂令武

侯呂澤之令索隱曰周呂國也令武謚也鄧侯蕭何安國王游秣

陵侯劉纒什邡侯雍桓之終高苑侯丙猜鄒成侯周

緜之制衍侯翟山稟侯陳錯之祗邠穀侯繪賀之穀

索隱曰謚法行見中外曰穀邠侯黃榮盛之慶廣陵侯劉襄之虜

史表作常侯劉襄案常亦謚法所不載定敷侯劉越柳敷侯劉罷之敷

索隱曰敷謚也說文云敷讀如躍

牧邱恬侯石慶之恬常樂侯稠雕

之肥邽會侯劉仁挾術侯劉昆景之行都昌侯朱充
之昌成安侯郭賞之刻賞子郭長之鄆王莽妻孝睦
之睦舞陽侯岑彭溧陽侯史崇之壯夷安侯鄧康之
義以上漢所用字當亦古謚法所傳又史記老子列
傳姓李氏名耳字伯陽謚曰聃又姓氏急就篇寧公
秦襄公會孫謚寧公支庶因以爲氏又一切經音義
卷二引謚法温故知新曰師尊嚴能憚曰師卷四引
謚法貴貴親賢曰仁殺身成人曰仁卷十三引謚法

賊人多累曰桀劉熙曰多以惡逆累賢人也卷十五

引謚法陽詐也卷二十三引謚法賤而得愛曰嬖

通鑑

建光元年嬖幸充庭胡三省注謚法賤而得愛曰嬖卷二十三二十四引謚法

知死不避曰勇縣命爲仁曰勇又鄧名世姓氏書辨

證七之引姓苑慈氏出自高陽氏才子八人其一倉

舒謚慈後世以爲氏又一先引姓源韻譜淵氏出自

高陽氏才子八人其一謚淵後世以爲氏

逸周書卷十四終

逸周書卷十五

孔氏無注

江都陳逢衡補注

明堂解第五十五

汪師韓曰魯用天子禮樂魯自僭也而托於成王之

賜先儒多有辨者若周公踐天子位此斷斷必無之

事然記有明堂位史有魯世家望溪方氏作周官辨

於明堂位一篇斷爲王莽劉歆所僞竄而特疑其文

不知何爲而作蓋無他書作證也余竊嘗得其證於

周書之明堂解其曰未能踐天子之位猶曰未踐明

堂之位以聽政耳時成王年十五歲攝政者行君之政令故曰君天下而不曰天下君逮弭亂六年成王年已二十能行天子政令矣於是乃會方國諸侯而朝之其曰天子之位者天子卽成王也位卽成王之位也率公卿士侍於左右誰率之乎乃周公率而侍於成王之左右卽王會解所云周公在左太公在右旁天子而立於堂上者也周公建焉建此堂耳明堂明諸侯之尊卑而謂周公敢以諸侯而居天子之位乎至七年致政則凡政無不自成王出者蓋在六年

猶不離乎周公也其文義顯明若此明堂位乃刪去之位二字而曰天子負斧依似天子卽指周公且移其解之後文于前改明爲朝而曰朝諸侯于明堂之位改宗周爲周公而曰此周公明堂之位也刪去故周公建焉五字而增損其文曰周公踐天子之位以治天下六年朝諸侯于明堂制禮作樂頒度量而天下大服要而論之明堂解乃自古方策所流傳而魯後人述之以著周公之勳勞其自成王以周公有勳勞於天下以下則魯人僭禮而增益之詞然魯但以

禮樂賜自成王未嘗以踐阼誣周公也故其文頻稱天子而曰天下傳之久矣又曰天下以爲有道之國蓋詞隱而指微焉不幸爲莽歆顛倒而又竄易史記以證之莽歆之禍不更烈于焚書也哉

大維商紂暴虐脯鬼侯以享諸侯天下患之四海兆民欣戴文武

補注鬼侯商諸侯紂殺而脯之以禮諸侯于廟事見呂氏行論篇鬼侯卽九侯史本紀九侯有女入于紂女不好淫紂怒殺之並脯九侯

是以周公相武王以伐紂夷定天下既克紂六年而武王崩成王嗣未能踐天子之位周公攝政君天下弭亂六年而天下大治

相去聲

補注夷平也武王卽天子位六年而崩與竹書紀年合武王崩成王嗣嗣繼也謂繼武王爲天子也是時成王年十三故未能踐天子之位言未能聽政也史記魯世家禮明堂位文王世子荀子儒效韓子難二淮南子齊俗汜論韓詩外傳卷三卷七卷八並有周公踐阼之說案踐者立也阼者東階也王會解云周

公在左左東也卽阼也此殆如後世宰相領班而乃
誣以身爲天子過矣今據此解言攝政可與紀年成
王元年命周文公冢百官參看此乃三代諒闇之制
冢宰掌邦治之職其曰君天下者蓋謂君理天下非
謂爲天下君也亂謂殷亂卽指武庚奄人徐人淮夷
之叛

乃會方國諸侯于宗周大朝諸侯明堂之位

補注方國四方諸侯之國宗周鎬京也明堂之制具
見大戴盛德小戴月令明堂位周禮考工等書

天子之位負斧依南面立率公卿士侍于左右

補注天子成王也禮明堂位鄭注謂是周公誤負背也斧依爲斧文屏風于戶牖間爾雅釋宮戶牖之間謂之展展卽依斧亦作黼其繡用斧故謂之斧蓋取其有斷也皇氏云斧依在明堂太室中央戶牖間南面者答陽也是時成王負斧依南面立其率公卿士侍于左右者則周公也

三公之位中階之前北面東上諸侯之位阼階之東西面北上諸伯之位西階之西東面北上諸子之位門內之東

北面東止諸男之位門內之西北面東上

三公補注禮明堂位正義曰此明朝位之法中階者南面

三階故稱中周公已居天子位餘有二公而云三公

者舉國本數衡案此來朝之公當如虞公宋公之類

指外諸侯之爲公者猶周禮言諸公也此三公三字

似不必泥至謂周公已居天子尤妄對稱之於蓋如

九夷之國東門之外西面北上八蠻之國南門之外北面

東上六戎之國西門之外東面南上五狄之國北門之外

南面東上

補注四裔來朝義固取面天子也故四門之外隨其所面而皆以右爲尊

四塞九采之國世告至者應門之外北面東上

補注案禮明堂位九采之國應門之外北面東上三句緊接諸男之國門西北面東上句下而四塞世告至五字則在九夷八蠻六戎五狄後與此不同鄭康成曰九采九州之牧典貢職者也正門謂之應門二伯率諸侯而入牧居外而糾察之也四塞謂夷服鎮服蕃服在四方爲蔽塞者新君卽位乃朝正義曰正

門謂之應門者以明堂無重門非路門外之應門李
巡云宮中南嚮大門應門也衡案明堂亦當有重門
故南門之外有八蠻而應門之外又有九采若云但
有應門豈八蠻九采同位而朝乎四塞九采謂極遠
之國四塞猶四極日出日沒之所也言自此以外則
非人力所通矣故曰四塞采事也言雖在要荒亦供
王事世告至者卽周禮蕃國世一見是也

宗周明堂之位也明堂明諸侯之尊卑也故周公建焉而

明盧本改諸侯于明堂之位制禮作樂頒度量而天下大

作朝

服萬國各致其方賄七年致政于成王

補注制禮作樂如周禮儀禮所載是已度丈尺量斗斛也方賄器貢服貢物貢嬪貢之類成王時千七百七十三國言萬國者誇大之辭致政復政也竹書紀年成王七年周公復政于成王

嘗麥解第五十六

此成王四年事也冲幼委裘變生骨肉故于免喪朝廟之後踵行夏禘之禮因命大正正刑書以儆厥後篇中引蚩尤以寓紂虐引武觀以寓三叔則戎衣一

卷十五
著破斧三年皆非得已故明刑卽以弼教而勿畏多
寵尤于九宗三致意焉蓋深有戒于鳴鴉之變也

維四年孟夏王初祈禱于宗廟乃嘗麥于太祖

嘗補注孟夏夏令之四月宗廟武王廟案紀年成王四
年初朝于廟在正月嘗麥在四月蓋踵行夏禘之禮
而薦新太廟也董仲舒曰禘者以四月食麥御覽八
百三十八引作王初祈禱于岱宗乃嘗麥于廟誤案
王于是年初免喪而蒲姑商奄猶作不靖焉得舉巡
狩之典至岱宗而祈禱乎管子輕重已曰以春日

始數九十二日謂之夏至而麥熟天子祀于太宗其
盛以麥麥者穀之始也宗者族之始也据此則御覽
岱宗蓋以管子祀于太宗而誤不知祈禱于廟是一
事祀于太宗以嘗麥又一事太宗猶太祖也故曰族
之始太祖后稷廟禮月令孟夏農乃登麥天子乃以
彘嘗麥先薦寢廟

是月王命大正正刑書

補注書罔命大正是太僕正此大正是刑官惠氏禮
說曰大正者大司寇凡秋官皆曰正衡案廣雅刑正

也此大正非蘇公卽康叔正刑書定律也

爽明僕告旣駕少祝導王亞祝迎王降階卽假于太宗少宗少祕于社各牡羊一牡豕三

補注僕馭僕也周禮小祝掌小祭祀將祀候禳禱祠之事少祝卽小祝亞祝則又次于小祝者假與嘏通惠士奇曰大宗少宗卽大宗伯少宗伯也少祕疑卽小史梁玉繩曰太宗願命有之衡案少祕祕祝之官見史記漢文帝紀應劭曰國家諱之故曰祕蓋祝史以神道設教故曰祕祝祕密也神也古者刑人于社

今將正刑書故假于社張惠言曰太宗太祖廟少宗
小祖廟少祕闕宮姜嫄廟也此與篇中大宗少宗爲
宗伯者不同羊豕少牢也羊一豕三者嘗麥以彘故
加二豕俎不與常禮同

史導王于北階王陟階在東序乃命太史尙大正卽居于

戶西南向九州之伯咸進

之字從
揚本補

在中西向宰乃承王中

升自客階作筴執筴從中

惠氏禮說以執筴
從三字斷句誤

宰坐尊中于

大正之前太祝以王命作筴筴告太宗

太宗玉海
引作宗正

王命口

口祕作筴許諾乃北向繇書于兩楹之間

補注北階北堂之階也房中半以北曰北堂有北階
大射儀工人士與梓人升下自北階位在北堂下則
北堂有階也陟升也堂之東西牆謂之序東序房中
近東牆處也乃命太史尙大正尙上也以大正將正
刑書故特尙之卽就也居位也戶西南向者奧也室
中西南隅謂之奧祭祀及尊者常處焉是時祕祝用
祈禱以神明其事故命大正卽居于是九州侯伯位
于中階之東故在中西向宰宰夫承奉也宰乃承王
中升謂奉正升自中堂蓋前此王在東序今則立于

兩柱之間以出命也客階西階筭簡書也自客階作筭謂宰由西階作簡以命大正也執筭從中從由也謂宰復以所作筭進于王也宰坐尊中于大正之前者坐止也是時大正在戶西南向故特止尊中于其前禮曰唯君面尊蓋以殊禮隆之案君燕臣列尊于東楹之西兩君敵體尊在兩楹之間今坐尊中于大正之前者變禮也太祝以王命作筭此所作筭乃祈禱之文筭告太宗蓋以正刑書事卜于神而因宗伯以禱也祕作筭許諾則告于神而神聽矣空方疑是

太史二字下文挾刑書升授大正是太史則此時北面
繇書于兩楹之間亦卽太史無疑繇致也書刑書也
無字曰筴有字曰書楹柱也堂之上東西有楹兩
楹之間謂堂東西之中也張惠言曰此當在太祖廟
堂嘗麥用薦禮在寢由寢出故升北階牧伯等則自
門入太史尙大正者太史以王命命大正升周官士
師受中鄭注中獄訟之成衡案秋官卿士獄訟成士師受中注謂受獄訟之成
也鄭司農云中者刑罰之中也張氏引作中獄訟之成以解此處中字似誤此蓋以武庚
罪辭告於諸侯在中在察也就堂下視之畢乃奉中

升而作筴執筴者太祝也尊當爲奠筴告太宗者以
正刑書之意告太祖也下句當是王命告少祕告少
祕則告少宗可知也繇用也用書作筴也王若曰以
下正刑書之辭大正所先作者非此告太宗之筴

王若曰宗揜大正昔天之初口作二后乃設建典命赤帝

分正二卿命蚩尤于宇少昊以臨西方

西舊作四

司口口上天

未成之慶

空方楊慎本作明明衡案司明明當作以明二字

補注王若曰以下乃申明作刑書之意或以此卽刑

書之辭非也案刑書卽九刑今亡觀下文筴刑書九

篇則非此可知宗卽下文九宗揜通作掩同也王將
以作刑書之意宣布同族故特呼宗與大正而告之
二后天皇地皇也赤帝炎帝神農氏也分正二卿如
周召分陝之謂少昊主西東方則黃帝氏之先主之
命蚩尤于字少昊于往也字謂隸其下以佐之此蚩
尤與神農同時非榆罔時作亂之蚩尤

蚩尤乃逐帝爭于涿鹿之河九隅無遺

補注神農氏衰帝榆罔之世諸侯相侵伐而蚩尤最
爲暴爰逐帝而居于涿鹿帝謂榆罔盧文弔曰河當

作阿梁處素曰史記五帝紀注涿鹿山名阪泉地名
一名黃帝泉至涿鹿與涿水合蓋所謂涿鹿之河河
字似不誤衡案梁說可據九隅九方也無遺言受其
荼毒靡有子遺也史記序阪泉之戰曰與炎帝敘涿
鹿之戰曰與蚩尤其實止一戰蓋蚩尤亦僭號炎帝
而阪泉與涿鹿連接非二地也

赤帝大懼乃說于黃帝執蚩尤殺之于中冀以甲兵釋怒
用大正順天思序紀于大帝

盧文弨曰舊校
大帝疑作太常

用名之曰絕

轡之野

補注赤帝榆罔也懾懼也史記蚩尤作亂不用帝命
于是黃帝乃徵師諸侯與蚩尤戰于涿鹿之野遂禽
殺蚩尤而諸侯咸尊軒轅爲天子中冀卽冀州之野
見山海經郭注冀州中土也故曰中冀用大正者大
刑用甲兵也黃帝以土繼火順五行之序于天故曰
順天思序紀于大帝謂昭告于天絕轡之野一曰凶
黎之邱此段暗指商紂暴虐武王伐罪弔民之事言
我周之所以大正于商者亦奉天罰如黃帝故事非
有貪也

乃命少昊清司馬鳥師以正五帝之官故名曰質天用大成至于今不亂

補注前主西方之少昊當炎帝神農時此少昊乃其後裔當榆罔之世清其名也爰以封于西故得以兵扼蚩尤之西路使不能逞及黃帝滅蚩尤遂命爲司馬司馬掌兵亦刑官也以有鳳鳥之瑞故又爲鳥師而鳥名五帝之官水火木金土也左昭二十九年傳蔡墨曰少昊有四叔曰重曰脩曰該曰熙實能金木及水世不失職據此則金木水三官少昊氏一家掌

之而火則祝融氏掌之土則句龍氏掌之正謂順其
序則五行治也故名曰質黃帝賜名也天用大成則
天下治矣故至于今不亂張惠言曰質摯古通左
氏少昊摯之立也爲鳥師而鳥名蓋少昊本名清以
能正五帝之官故改名質質正也案史記帝摯爲馨
子不當黃帝時竹書紀年帝摯少昊氏在黃帝後與

此合

其在啟之五子

啟舊作殷盧文弨曰殷當作夏衛案殷乃啟之訛今改正

忘伯禹之命

假國無正用胥興作亂遂凶厥國皇天哀禹賜以彭壽思

正夏略

補注五子啟之庶子五觀也黨于有扈故國語士匱
對楚莊以啟有五觀與堯有丹朱舜有商均湯有太
甲文王有管蔡並號姦子而昭元年左傳趙孟亦曰
夏有觀扈也韋昭注以太康昆弟當五觀又引書序
太康失國昆弟五人須于洛汭以明觀卽洛汭之地
並誤案五觀爲啟庶子而太康與作歌之五子乃嫡
子爲同母弟故書曰厥弟五人御其母以從其母者
五子之母亦卽太康之母也厥弟者太康之弟也則

是作歌之五子爲啟賢子而五觀爲啟姦子一曰武
觀據竹書帝啟十一年放王季子武觀于西河十五
年武觀以西河叛彭伯壽帥師征西河武觀來歸則
五觀爲姦子爲庶子益信蓋啟能承敬禹之道故傳
位于嫡武觀以庶子不得承大統故黨于扈以禹不
傳賢爲非又復謗啟曰啟乃淫溢康樂野于飲食將
將銘筭磬以力湛濁于酒渝食于野萬舞翼翼章聞
于天天用弗式說具載墨子非樂上蓋以鈞臺之享
天穆之舞有扈之戰均爲啟不德之事而誣以淫溢

豈非忘伯禹傳子之命乎而謂卽作歌之五賢子誤
矣然且武觀是一人作歌是五人彼忘伯禹之命者
又焉得有明明我祖一語出自其口乎漢書古今人
表遂謂啟子昆弟五人號五觀不知武觀據邑以叛
必非須于洛汭之栖栖者而路史乃云后啟五庶俱
封于觀是爲五觀夫古未有五人合封一國者假國
無正正政也國指西河用胥興作亂指武觀遂凶厥
國謂滅亡也彭壽祝融之後陸終第三子彭鏗之裔
彭大彭壽名思正夏略謂以武定亂而姬氏一治按

成王時三叔忘文考之命而叛周亦猶五子忘伯禹
之命而作亂故借往事以寓之皇天哀禹賜以彭壽
則叔且之禦亂後先如一轍焉

今子小子聞有古遺訓子亦述朕文考之言不易子用皇

威不忘祗天之明典令底我大治底字盧本作空方今從楊本用我九

宗正州伯教告于我相去聲在大國有殷之多辟多字盧本作空方今

從楊本自其作虐于古虐字盧本作空方今從楊本是威厥邑無類于冀

州嘉我小國舊小國下仍行小國二字今刪其命子克長王國長上聲王國二字善

倒今
改正

補注聞古遺訓卽指上二事三叔之亂與啟五子同
三叔者文考之子也故成王自謂述朕文考之言以
倣之不易不變易也皇大也威武也予用皇威則東
征之事出自成王命非周公專擅益信不忘祇天之
明典令祇敬也典令大經大法所在故管叔啓霍叔
囚蔡叔降而罰無可貸三叔皆同姓故又呼九宗正
以及牧伯而欲其教告于我也九宗九族也正長也
漢百官表有宗正應劭曰彤伯入爲宗正相在大國
相視也大國謂殷有殷之多辟指紂與武庚辟如辟

則爲天下戮之辟自其作虐于古謂其得罪於古先
哲王實孽由自作也是威厥邑威卽子用皇威之威
厥邑朝歌也無類于冀州蓋警惕殷頑之語恐其復
有不靖則當殄滅之無遺育無俾易種于茲新邑矣
無類猶云無遺類也古者指天下爲冀州嘉我小國
周自謂猶云小邦周也其命子克長王國與立政以
長我王國同當如弼我不基之義

嗚呼敬之哉如木旣顛厥巢其猶有枝葉

句作休爾弗

敬恤爾

句執以屏

句惠氏禮說以爾執以屏助予一人爲句課

助予一人集天

之顯句亦爾子孫其能常憂恤乃事句勿畏多寵無愛乃

歸亦無或刑于鰥寡非罪句惠乃其常無別于民

補注此申儆之辭故發歎而勸之以敬也如木既顛

厥巢寓前此三叔之亂其猶有枝葉寓後此綱繆膺

戶不可不謹也休美也執拘也屏除也言爾同異姓

有弗敬恤乃事者則司刑將執以屏除之以助于一

人集天之顯集成也顯明也卽所謂明典令也亦爾

子孫其能常憂恤乃事則世世勿替矣勿畏多寵法

有必伸也口不道忠信之言爲歸無愛乃歸則犯法

者必少亦無或刑于鰥寡非罪則榮獨固所當恤而無辜尤所當愍惠乃其常無別于民則爲殷民爲周民總視如一體矣李兆洛曰惠順也順汝所常供之職別絕也毋自絕于民

衆臣咸興受大正書乃降太史策刑書九篇以升授大正

乃左還自兩柱之間

盧文弨曰左沈疑右

補注衆臣九宗及州伯也咸興者前此拜聽王命至語畢而咸起也受大正書書卽刑書乃降者衆臣也筴挾也刑書九篇卽所謂九刑也左文十八年傳先

君周公制周禮曰則以觀德德以處事事以度功功
以食民作誓命曰毀則爲賊掩則爲藏竊賄爲盜盜
器爲姦主藏之名賴姦之用爲大凶德有常無赦在
九刑不忘注誓命以下皆九刑之書九刑之書今亡
又左昭六年傳三月鄭人鑄刑書叔向貽子產書曰
夏有亂政而作禹刑商有亂政而作湯刑周有亂政
而作九刑蓋謂禹以有苗之亂作禹刑湯以桀之亂
作湯刑周以三叔之亂作九刑也是時大正仍居在
戶西南故太史策刑書以升授之兩柱之間卽兩楹

之間蓋由兩楹之間升於戶西以書授大正而復左

還至此也

布箴

布字慮本空方今從揚本

大正曰欽之哉諸正敬功爾

句惠氏禮說以諸正

敬功為句

頌審三節無思民因順爾臨獄無煩正刑有掇大循

乃德

大舊作夫說

式監不遠以有此人保寧爾國克戒爾服世

世是其不殆維公咸若太史乃降大正坐舉書乃中降

張惠

言曰乃當作及

再拜稽首王命大正升拜于上

大下舊衍史字張惠言曰史字疑羨

今王則退

補注布如露布之布布箴猶懸書也布箴大正者蓋

謂太史左還自兩楹之間述王命箴大正以及諸正也据下文有太史乃降語則此爲太史箴大正無疑諸正大正之屬敬功爾卽敬爾由獄之意頌通作訟三節三刺三宥三赦也無思民因反辭也訟必有因言聽訟者能無思民因乎順爾臨獄無頗謂不偏也掇拾也正刑有掇謂援取前事以斷今也刑有定者正之以律刑無定者援之以例重典中典輕典比而驗之拾取他事而證之則刑無不正矣循遵也式監不遠指蚩尤五子之事蓋以戒侯國也以有此人

謂臨獄無頗之人保寧兩國則無滅亡之禍矣克能也戒飭也服職也殆危也公正也若順也太史述箴已畢於是自兩楹而降大正坐舉書書刑書也乃中降者謂由戶西從中執箴而降也再拜稽首大正謝王命也故王命大正升拜于上以成禮而退上堂上也于是作刑書事畢

是月士師乃命太宗序于天時祠大暑乃命少宗祠風雨百享士師用受其馘以爲之資邑

補注張惠言曰爲正刑書故士師命祭太宗大宗伯

小宗少宗伯衡案此因作刑書而用祈禱之事且以
偏告國中也士師司寇之屬序于天時正時令也是
月爲孟夏四月故祠大暑而上雩以祀風雨蓋先時
祈至也周禮中春逆暑是常行之禮此祠大暑及風
雨是特舉之禮風雨風師雨師也百享從祀風雨之
百神周禮大宗伯以禋燎祀颯師雨師釂鬱也謂祭
肉也士師用受其馘以爲之資邑者邑謂城邑資通
作齎謂士師遷以此祭肉齎于遂大夫縣大夫之屬
乃命百姓遂享于富無思民疾供百享歸祭閭率里君以

為之資野

補注此命百姓亦士師也遂享于富祭則受福也無
思民疾言能無思疾苦之事而為之祈禱乎百享百
物之祭也歸讀如歸豚之歸歸祭閭率里皆社也閭
里門也周禮地官五家為比五比為閭閭侶也二十
五家相羣侶也里居也地官遂人五家為鄰五鄰為
里亦二十五家許慎曰周禮二十五家為社率讀若
遂與術通謂祭行也蓋坊庸郵表畷之類君以為之
資野者爾雅邑外謂之郊郊外謂之牧牧外謂之野

凡井田廬舍山川溝洫之處皆野也君主也此所謂君蓋指鄉大夫言資野則侯伯亞旅均受其賜矣

宰乃命家邑縣都祠于太祠乃風雨也宰用受其職故以爲之資采

補注宰宰夫家邑縣都王子弟及卿大夫之食邑太祠猶上祠古有上祠中祠下祠三等祠風雨在家邑縣都爲太祠在王國則爲中祠職故謂牛羊魚豕之類各有等級也家邑縣都皆采地故曰以爲之資采君乃命天御豐穡享祠爲施大夫以爲資箴大史乃藏之

于盟府以爲歲典

補注天御御廩也豐穡美穀也享祠爲施蓋取天御之美穀以祀先代爲施者漢郊祀志荆巫祀堂下巫先司命施糜之屬師古曰施糜其先常施設糜鬻者也大夫以爲資箴勸有家也於是通國皆知有作刑書一事太史乃藏之盟府以爲掌故故曰歲典是爲嘗麥之禮

逸周書卷十五終

逸周書卷十六

孔氏無注

江都陳逢衡補注

本典解第五十七

此成王寶周公之言以為典也明德政教字民禮樂

王以是問故公以是告

維四月既生魄王在東宮召公告周公曰嗚呼朕聞武考

不知乃問不得乃學俾資不肖永無惑矣今朕不知明德

所則政教所行字民之道禮樂所生非不念不知不知舊作而知

據大戒解故問伯父文選左思魏都賦李善注引周書成王曰朕不知字民之道敬問伯父又

沈約齊故安陸昭王碑李善注引同據此則故問故字當作敬說文佺胡因切引逸周書以佺伯父佺與問音近然彼引與朕實不明連接而此篇止故問伯父四

字其朕實不明乃大戒篇語蓋未知誰脫矣

不朕補注東宮成王所居王在東宮蓋猶在七年保傅之

難四內召如君命召之召公周公也盧本衍召公二字似

以召公爲召公爽矣失之不知乃問不得乃學此武

王作聖之基不肖成王自謂言資武考之問學庶可

本以無惑明德所則脩身之事政教所行治平之事字

民之道撫惠百姓之事禮樂所生制治太平之事非

不念不知言於此四端非不求索實由不知故必咨

訓迪乃有獲也

周公再拜稽首曰臣聞之文考能求士材者智也

材字盧本空方

今從楊本補

能興民利者仁也能收民獄者義也能督民過者

德也為民犯難者武也

難去聲

補注自此以至民無淫慝俱指明德所則言周公對

成王稱臣其未嘗踐天子位尤屬顯然能求士材者

辨賢否也故曰智能興民利者休養生息也故曰仁

能收民獄者刑所當刑也故曰義能督民過者以身

為教也故曰德為民犯難者執干戈以衛社稷也故

曰武

智能親智仁能親仁義能親義德能親德武能親武五者

昌于國曰明明能見物高能致物物備咸至曰帝帝鄉在

地曰本本生萬物曰世世可則度曰至

度字盧本空方今從楊本補

補汪智能親智五句言王者有如是之德則能以類

召類矣五者昌于國則賢哲在位能知人矣故曰明

明能見物無不照也高能致物無不覆也物備咸至

醴泉芝草無不應也故曰帝帝鄉在地曰本乾元所

以資始也本生萬物曰世悠久所以成物也世可則

度曰至百世以俟聖人而不惑也至如中庸至矣之

至

至德昭天

昭舊作照

百姓用驚

用字盧本空方今從楊本補

備有好醜民無

不戒顯父登德德降則信信則民寧

顯父登德三句已見成開解

為畏

為極民無淫慝

補注至德昭天合撰合明之象百姓用驚服教畏神

也備有好醜民無不戒善者勸而惡者懲也顯父司

徒也登德尚德也德降則信信則民寧本諸身而信

于民也畏威也極中也淫慝過差也

生民知常利之道則國疆序明好醜必固其務好醜下盧本一字空

方楊本作乃字案均分以利之則民安說文示部引逸周書均分呂祿之

阜用以資之則民樂阜字盧本空今從楊本補明德以師之則民讓樂音

洛下

補注此則政教所行也常利之道農桑是也重農桑

則民富故國疆序明好醜旌別淑慝也必固其務務

本務也均分以利之謂計口授田而豪強不得兼并

故民安阜用以資之謂財用相資以羨補不足故民

樂明德以師之興賢能也賢能興則齒德崇故民讓

生之樂之則母之禮也政之教之遂以成之則父之禮也

父母之禮以加於民其慈惟博

末二字盧本空方今從楊本補

補注此則字民之道也生之樂之慈也政之教之遂

以成之則慈而濟以嚴焉禮猶道也如是則有父之

尊有母之親而天下樂其顧復矣故其慈惟博博廣

也普也

古之聖王樂體其政士有九等皆得其宜曰材多人有八

政皆得其則曰禮服士樂

音洛

其生而務其宜是故奏鼓以

章樂奏舞以觀禮奏歌以觀和禮樂既和其上乃不危

補注此言禮樂所生之事樂體其政謂作樂以象其
功德左傳人有十等王公大夫士皂與隸僚僕臺今
舉王以下言故曰士有九等皆得其宜位得當也材
多師濟之義八政君臣父子夫妻兄弟也皆得其則
則倫紀正矣故曰禮服服行也士樂其生祿足以代
耕也務其宜則能受業講貫而習復矣樂有八器獨
舉鼓者鼓人掌六鼓四金之音聲樂以金鼓爲重故
奏鼓以章樂舞有文舞武舞奏舞以觀禮如季札見
舞韶箭之類歌人聲也書曰詩言志歌永言聲依永

律和聲故奏歌以觀和禮樂既和則治之盛也故上
乃不危

王拜曰允哉幼愚敬守以為本典王曰人必求六齋本典

補注幼愚成王自謂也

官人解第五十八

此與大戴文王官人篇同按其辭義與六韜相似其
原蓋出於太公而周公復錄以進成王如職方是周
公所作而穆王抄出觀覽遂以為穆王時書矣

王曰於呼太師朕維民務官論用有徵觀誠考言視聲觀

色觀隱揆德可得聞乎

補注王成王也世紀八年王始躬親政事以周公爲
太師案洛誥成王於周公稱公未聞稱太師也設官
以牧民故曰維民務官官不當位則民受其咎故不
可不慎論辨論也用謂授以爵而試之事

周公曰亦有六徵嗚呼乃齊以揆之

補注唐太宗帝範曰古之明王用人必先六徵本此
齊一也揆度也

一曰富貴者觀其有禮施

補注施予也富貴者能以禮施則不驕不吝而能得
衆矣

貧賤者觀其有德守

補注守操守也貧賤者能以德守則不干進不辱身

而動必以正矣

嬖寵者觀其不驕奢隱約者觀其不懾懼

補注嬖寵近倖之臣隱約高蹈之士不驕奢則不僨

事不懾懼則有以當大任而不疑

其少者觀其恭敬好學而能悌

好去聲

補注恭敬其質也好學其文也能悌其本也

其壯者觀其廉潔務行而勝私

行去聲

補注廉潔則有守務行則有爲勝私則不以勇害義

其老者觀其思慎彊其所不足而不踰

補注思慎則慮事周彊其所不足則不以氣血衰而

自廢不踰不越也

父子之間觀其孝慈兄弟之間觀其和友君臣之間觀其

忠惠

補注父子兄弟君臣之大倫三者不失而後可爲

人

鄉黨之間觀其信誠

補注人能取信於鄉黨則大而天下國家均可托矣

省其居處觀其義方省其喪哀觀其貞良省其出入觀其

交友省其交友觀其任廉

喪去聲

補注居處燕溺之候觀其義方則不至失於冥冥喪

哀謂失位窮處非謂居喪哀毀也大戴曾子立事曰

居哀而觀其貞也去一喪字其義自見觀其貞良則

無失身苟賤之行出入舉動也觀其交友者不知其

人視其友也以信相親曰任廉謂廉於財

設之以謀以觀其智示之以難以觀其勇煩之以事以觀

其治臨之以利以觀其不貪濫之以樂以觀其不荒

樂音洛

補注設之以謀以觀其智明足以運籌也示之以難

以觀其勇氣足以任事也煩之以事以觀其治才足

以勝劇也臨之以利以觀其不貪廉足以自守也濫

之以樂以觀其不荒義足以自正也濫漬也濫大戴

作藍盧注云藍猶濫也

喜之以觀其輕怒之以觀其重

補注輕佻則易犯持重則難奪喜之以觀其輕怒之
以觀其重互文也喜怒皆不為所奪則中有主也

醉之酒以觀其恭從之色以觀其常遠之以觀其不二昵

之以觀其不狎

從音縱六韜選將篇言入證語意
與此合又莊子列御寇九徵本此

補注酒能亂德故醉之以觀其恭色能喪志故從之

以觀其常遠之以觀其不二壹於忠也昵之以觀其

不狎本於敬也

復徵其言以觀其精曲省其行以觀其備此之謂觀誠

戴

採取其志以觀其情考其陰陽以觀其誠覆其徵言以觀
其信曲省其行以觀其備成此之謂觀誠也盧紹弓謂精

當作情蓋以大戴探取其志二句抵周書復微其言二句
孔彞軒大戴注則謂周書其微作微其信作精蓋以大戴
覆其微言二句當周書復微其言二句案大
戴與周書所記互有詳略各傳其說可也

補注復微其言反覆以證其言之是否也復與覆通

以觀其精精猶真也微妙曰精曲省其行曲折以察

其行之邪正也以觀其備則表裏精粗無不得矣

二曰方與之言以觀

以觀下疑脫二字

其志殷以淵其器寬以悌

虛本從大戴作其氣寬以柔

其色儉而不詭其禮先人其言後人見其

所不足曰日益者也

補注方與旁通偏也殷以淵深也寬綽也能容衆也

悌豈弟也儉約也不諂不阿媚也其禮先人與人恭也其言後人不敢肆也見其所不足則自知名而學業敏矣

好臨人以色高人以氣賢人以言防其所不足發其所能日日損者也

補注臨人以色則不能儉矣高人以氣則不能以禮先人矣賢人以言則不能後人矣防其所不足曲護其短而唯恐人知也發矜誇也發其所能則自滿而不復求進矣

其貌直而不止其言正而不私不飾其美不隱其惡不防其過曰有質者也

補注直而不止無回曲也正而不私無暗昧也不飾其美無伐善也不隱其惡不防其過無慝情也

其貌曲媚其言工巧飾其見物務其小證以故自說曰無質者也

補注曲媚善承順工巧謂有口才飾其見物耀於外也務其小證據以鳴也以故自說故詐也說謂喜悅大戴盧注言以事自解說誤

喜怒以物而色不變煩亂以事而志不營深導以利而心不移臨懾以威而氣不卑曰平心而固守者也

補注喜怒以物而色不變其神靜也煩亂以事而志不營其識定也深導以利而心不移其欲淡也深疑作探臨懾以威而氣不卑其節抗也

喜怒以物而心變易煩怒以事而志不治導之以利而心遷移臨懾以威而氣懾懼曰鄙心而假氣者也

盧文弨曰李善東都

賦注引懾懼作悚悚

補注鄙心心粗而貪也假氣氣浮而偽也

設之以物而數決敬之以卒而度應不文而辯曰有慮者

也戴震曰不文當作不學

數決補注設之以物試以事也數決有敏斷卒謂猝然之

喜然事敬與倣同度應謂能料事應物也不文而辯謂不

必繁稱文辭而自中典要

難決以物難說以言

舊脫言字 据大戴補

守一而不可變困而不知

止曰愚依人也

不決補注難決以物事至而不能決也難說以言固執而

喜然不能以言諫也守一而不可變知一而不知二也困

而不知止謂當事勢窮蹙而不知轉計也盧文弨曰
依當讀爲菱蔽也

營之以物而不誤犯之以卒而不懼置義而不可遷臨之
貨色而不過曰果敢者也

補注營亂也物事也煩而御之以簡動而鎮之以靜
故不誤謂臨事不惑也誤與虞通魯頌闕宮無貳無
虞毛傳虞誤也犯之以卒謂以意外倉卒之事干之
不懼則中有裁決也置義而不可遷勇於赴義也臨
之貨色而不過目不過心亦不過拒之決絕也

移易以言志不能固已諾無決曰弱志者也

補注移易以言失其守者其辭支也志不能固奪於外也已諾無決謂已應諾之事而又搖惑也

順予之弗為喜非奪之弗為怒沈靜而寡言多稽而險貌

曰質靜者也

盧文弨曰大戴險作儉古通用

補注順予之弗為喜非奪之弗為怒寵辱不驚也沈靜氣不浮寡言口不肆多稽而險貌察於內而不露於外也

屏言而弗顧自順而弗讓非是而彊之曰妬誣者也

補注屏辭通屏言便言也弗顧之言與行違也自順而弗讓順如飾非順過之順弗讓不少遜也非是而彊之行僻而堅也如忌也誣謂輕佻失據

微而能發察而能深寬順而恭儉溫柔而能斷果敢而能屈曰志治者也

補注微而能發明足以照也察而能深習足以燭也寬順而恭儉與人以可親也溫柔而能斷則非婦人之仁果敢而能屈則非匹夫之勇

華廢而誣巧言令色皆以無爲有者也此之謂考言

補注盧文弨曰案詩廢為殘賊王肅云廢大也張湛注列子場朱篇同此亦當作大解衡案華有虛義後漢馬融傳注華譽虛譽也

三日誠在其中必見諸外以其聲處其實氣初生物物生有聲聲有剛柔清濁好惡俱去聲咸發於聲心氣華誕者其

聲流散心氣順信者其聲順節心氣鄙戾者其聲斯醜斯舊

作醜括大戴改案斯與醜音義相近疑本作醜而傳寫又誤為醒也心氣寬柔者其聲温和

信氣中易義氣時舒和氣簡備勇氣壯力聽其聲處其氣考其所為觀其所由以其前觀其後以其隱觀其顯以其

小觀其大此之謂視聲

補注設在其中必見諸外有諸內必形諸外也以其
聲處其實實情實也處分別也氣初生物物生有聲
天地自然之感也剛柔清濁好惡六者察聲之大端
華不實也誕妄也流散飄忽也順慎也信實也順節
語有倫次也鄙粗鄙戾乖戾也禮內則烏鵲色而沙
鳴鬱注沙猶嘶也釋文嘶音西字又作斯音同正義
曰嘶謂酸嘶古之嘶字單作斯耳周禮內饗注沙嘶
也漢書王莽傳莽爲人大聲而嘶注嘶聲破也方言

癯破散也東齊聲散曰癯秦晉聲變曰癯說文癯散
聲也誓悲聲也案斯癯癯誓俱通用醜愧恥也寬
柔安舒也溫和靄然可聽也中正也易平易也時舒
合宜也簡備不煩而能該括也壯力能任重也

四曰民有五氣喜怒欲懼憂喜氣內蓄雖欲隱之陽喜必
見怒氣內蓄雖欲隱之陽怒必見欲氣懼氣憂悲之氣皆
隱之陽氣必見五氣誠於中發形於外民情不可隱也

補注陽喜陽怒陽氣必見者夫微之顯誠之不可掩
也

喜色猶然以出怒色焉然以侮欲色嫗然以愉懼色薄然
以下憂悲之色瞿然以靜

補注爾雅釋詁鬱陶絲喜也郭注禮記曰人喜則斯

陶陶斯詠詠斯猶猶卽絲也薦進也荀子儒效以相

薦樽注薦樽皆謂相陵駕也嫗然以愉謂和悅也嫗

然好色貌薄然以下厭然消阻之貌薄迫也瞿然以

靜瞿瞪視也漢書惠帝贊聞叔孫通之諫則懼然師

古曰懼讀曰瞿瞿然失守貌又東方朔傳吳王懼然

改容師古曰懼然失守之貌也

誠智必有難盡之色誠仁必有可尊之色誠勇必有難懾
之色誠忠必有可新之色誠潔必有難污之色誠靜必有

可信之色質色浩然固以安偽色蔓然亂以煩

質色偽色
二色字舊

缺据大
戴補

雖欲改之中色弗聽此之謂觀色

補注難盡之色謂不與人以揣測也誠智言非假托
之智餘倣此誠仁則安敦而高厚故必有可尊之色
誠勇則死生不懼故必有難懾之色誠忠則內外如
一故必有可親之色新親通誠潔則夷齊是已故必
有難污之色誠靜則坦率自然故必有可信之色質

色本乎天真故無虛假皓皓通固堅固安舒也偽色
與質色相反蔓然膠葛紛紜之貌亂以煩內多欲而
顛倒也雖欲改之中色弗聽則人之視已如見其肺
肝矣此二語總結上文蓋謂誠仁則其色必仁誠勇
則其色必勇不能改也

五曰民生則有陰有陽人多隱其情飾其偽以攻其名有
隱於仁賢者有隱於智理者有隱於文藝者有隱於廉勇
者有隱於忠孝者有隱於交友者如此不可不察也

補注內藏曰陰外見曰陽隱其情陰也飾其偽陽也

攻專治也隱於仁賢謂以此自掩蓋博虛譽也餘倣此

小施而好德小讓而爭大言願以為質偽愛以為忠尊其得以改其名如此者隱於仁賢者也

改汪士漢本作故如此者六條舊本或無

者字或無如者字今補改一例

補注小施而好德少與以沽名也小讓而爭大廉於介介而露於昭昭也言願以為質大戴盧注曰愿當聲誤為願也衡案言願猶願言也願如不願乎其外之願言其人本無質行而恆稱道於人以自表白也

偽愛以爲忠偽愛面爲親暱也以爲者假托之謂尊
其得得與德通色取也改其名行違也

慮誠不及佯爲不言內誠不足色示有餘自順而不讓措

辭而不遂如此者隱於智理者也

慮誠不及上舊有前總
唱功四字按大戴無今

刪

補注慮誠不及短於謀也佯爲不言奸深以文其固
陋也內誠不足色示有餘亡而爲有虛而爲盈約而
爲泰也自順而不讓自順其非而不少遜也措辭而
不遂謂不終竟其辭而恆吞吐其言各居是非之半

也

動人以言竭而弗終問則不對佯爲不窮口貌而有餘假道而自順因之口初窮則托深如此者隱於文藝者也

補注動人以言竭而弗終謂以難喻之言動人如滅三耳之類竭揭也旣揭其旨而又弗終其說以啟人疑乃又不對而佯爲不可窮蓋其中本無甚深之義故爲此態以欺世盜名也假道而自順假托道德以順己之欲假如五霸假之也之假

口言以爲廉矯厲以爲勇內恐外誇亟稱共說以詐臨人

如此者隱於廉勇者也

補注口言疑是矯言矯言以爲廉廉於口而不廉於心也矯厲以爲勇勇於外而不勇於內也內恐外誇外彊中乾色厲而內荏也亟稱其說以詐臨人亟稱猶孟子亟稱於水之意蓋謂言之不已欲以見信於人而實則借以售其詐也

自事其親而好以告人飾其見物不誠於內發名以事親自以名私其身如此者隱於忠孝者也

補注自事其親而好以告人欲以孝聞於人也飾其

見物不誠於內如食而弗敬之類發名以事親發與
伐通誇也蓋以親弋名而求重於世也自以名私其
身者善則歸已也

比周以相譽知賢可徵而左右不同不同而交

盧本不同
二字不重

案舊本
皆有

交必重己心說而身不近身近而實不至懼不盡

見於衆而貌克如此者隱於交友者也此之謂觀隱

補注比周以相譽朋黨也知賢可徵已知其人矣而

左右不同故鑿柄以示之蓋將招之使附已也不同

而交則其人必尊我而不相背故必重己心說而身

不近使之遙聞聲而相思也身近而實不至不示人以璞也懼不盡見於衆而貌克者惟恐知我之不盡而畢露於顏面以求勝也貌克疑當作貌充貌充心虛見列子

六曰言行不類終始相悖外內不合雖有假節見行曰非

成質者也

行俱去聲

補注類善也悖逆也假節見行謂假托志節以飾其

美

言忠行夷爭靡及私口弗求及情忠而寬貌莊而安曰有

仁者也行去聲

補注忠直也夷平也爭靡及私急公也情忠而寬主

乎內者直而溫也貌莊而安見於外者敬而和也

事變而能治效窮而能達措身立方而能遂曰有知者也

補注能治謂能理也效窮而能達屈而能信也措身

立方而能遂謀無弗成功無弗就也

少言以行恭儉以讓有知而言弗發有施而口弗德曰謙

良者也

補注少言以行慎於言而敏於事也恭儉以讓則能

下人矣有知而言弗發不自炫其才也有施而口弗
德不自多其惠也

微忽之言久而可復幽閒之行獨而弗克其行亡如存曰
順信者也

補注微忽之言久而可復庸言必信也幽閒之行獨
而弗克庸行必謹也行亡如存能主敬也

貴富恭儉而能施嚴威有禮而不驕曰有德者也

補注祿愈崇而身愈約位愈高而志愈謙望愈隆而
心愈小可以當此矣

隱約而不懼安樂而不奢勤勞而不變喜怒而有度曰有

守者也 樂音洛

補注窮不失志故不懼富而好禮故不奢勤勞而不

變如北山行役之大夫是已發而皆中節故有度

直方而不毀廉潔而不戾彊立而無私曰有經者也

補注直方而不毀不毀方瓦合也廉潔而不戾不矯

情立異也彊立而無私剛不過乎中也經常也

虛以待命不召不至不問不言言不過行行不過道曰沈

靜者也 行去聲

補注虛以待命不急仕也不召不至其品重也不問
不言不越俎也言不過行行不過道道言也言願行
行願言是爲不過
忠愛以事親驩以盡力而不同敬以盡力而不口曰忠孝
者也

補注忠愛愛出於誠也驩以盡力勞而不怨也驩喜
悅也同邪也事親以道不衰邪也忠孝一心於孝也
盧文弨曰大戴作歡欣以敬之盡力而不面敬以安
人以故名不生焉初學記引周書亦作歡以敬之盡

力而不固敬以安之案回與固皆面之訛卽上文所
云面於敬愛是也缺處疑是名字亦見上文衡案面
於愛敬見大戴周書無
合志而同方其其憂而任其難行忠信而不疑口隱遠而
不舍曰交友者也

補注合志同方其道同也其憂任難以義從也

志色辭氣其人甚偷進退多巧就人甚數辭不至少句其

所不足謀而不已曰僞詐者也

此段較大戴脫落甚多因傳此書者各有詳略故也

補注偷苟且也進退多巧虛而委蛇也就人甚數貌

爲親暱也辭不至少多爲言說以悅人也其所不足
謀而不已患得之心甚也

言行亟變從容克易好惡無常行身不篤曰無誠者也好行

惡俱去聲行
身之行如字

補注言行亟變更革不一也從容克易舉動反覆也

好惡無常喜怒叵測也行身不篤後先易轍也

少知而不大決少能而不大成規小物而不知大倫曰華
誕者也

補注此小有材而未聞君子之大道者淮南說山訓

人不小學不大迷不小慧不大愚是也規猶規規也

小見之貌

規諫而不類道行而不平曰竊名者也而不類大倫曰

補注類善也規諫而不類謂諍人則是而自治則非

也道引導也道行而不平謂立訓則正而率由則乖

也

故曰事阻者不夷畸鬼者不仁舊作時口者不面譽者不

忠飾貌者不靜假節者不平多私者不義揚言者寡信此

之謂揆德大戴揆德下尚有四百餘字疑亦周書關文

補注應事齟齬者其立心必險故不夷夷平也畸鬼
猶倚魁荀子修身篇注倚魁謂偏倚狂怪是也畸鬼
則中情叵測故不仁面譽者佞故不忠飾貌者僞故
不靜靜通作情無實也盧文弨曰表記文而靜鄭云
靜或爲情衡案文選稽康絕交書欲降心順俗則詭
故不情李善注引周書飾貌者不情據此當作情字
假節見前不平謂偏頗反側